



Ўзбекистон Республикаси Президентининг
ҚАРОРИ

ҚУРБОН ҲАЙИТИНИ НИШОНЛАШ ТҮҒРИСИДА

Муборак Қурбон ҳайитининг халқимиз маънавий ҳаётидаги ўрни ва аҳамиятини эътиборга олиб, миллийдиний қадриятларимизни сақлаш ва улуғлаш, фуқароларнинг ҳамжиҳатлиги ва меҳр-оқибатини мустаҳкамлаш, уларнинг руҳий ва маънавий оламини янада юксалтириш мақсадида ҳамда Ўзбекистон Республикаси Президентининг “Диний байрам – Қурбон ҳайитини дам олиш қуни деб эълон қилиш ҳақида”ги 1991 йил 20 июндаги ПФ-221-сон Фармонига мувофиқ:

1. 2012 йилда Қурбон ҳайитининг биринчи қуни 26 октябрь жума кунига тўғри келиши ҳақида Ўзбекистон мусулмонлари идорасининг мурожаатини инобатга олиб, 2012 йил 26


октябрь дам олиш қуни деб белгилансин ва мамлакатимизда байрам сифатида кенг нишонлансин.

2. Республика “Нуроний”, “Маҳалла” жамғармалари ва бошқа барча мутасадди давлат ва жамоат ташкилотлари Қурбон ҳайитининг жойларда тартибли ва юқори даражада, халқимизнинг миллий қадриятларига мос равишда ўтиши учун тегишли тадбирларни амалга оширсин.

3. Ўзбекистон Миллий телерадио-компанияси, Ўзбекистон Миллий ахборот агентлиги ва бошқа оммавий ахборот воситаларига байрам тадбирларини кенг ёритиш тавсия этилсин.

**Ўзбекистон Республикаси
Президенти** **И. КАРИМОВ**

Тошкент шаҳри, 2012 йил 22 октябрь.



ҚУРБОН ҲАЙИТИНГИЗ МУБОРАҚ БЎЛСИН!

Курбон ҳайитининг файзу баракоти қалбларимизни ва хонадонларимизни мунашвар айламоқда. Бу улуғ кунда Ислом оламидаги барча имон-эътиқодли мусулмон биродарларимизнинг қалблари равшан, диллари хушнуд, нигоҳлари муқаддас Каъбага қаратилган бўлиб, улар Аллоҳнинг фазлу қарамидан умидвордирлар.

Бу улуғ айёмни элу юртимизда меҳр-оқибат, ўзаро биродарлик, катталарга ҳурмат, кичикларга иззат, химмат ва саҳоват каби анъаналаримиз тобора мустаҳкам қарор топаётгандан бир шароитда кўтаринки рух билан кутиб олаётганимиз янада қувонарлидир.

Айниқса, муҳтарам Президентимизнинг Курбон ҳайитини нишонлаш тўғрисидаги қарори қабул қилиниши юртимизда азалий анъаналаримизга алоҳида эътибор берилаётганининг ёрқин далили бўлди. Унда ҳайит байрамини жойларда тартибли ва ҳалқимизнинг миллий қадриятларига мосравишда ўтиши учун барча тадбирларни амалга оширишга катор мутасадди ташкилотлар жалб қилинган. Бу ҳалқимизга янада қувонч бахшида этди.

Маълумки, бу кунда барча мусулмонлар бир-бирларини байрам билан кутлаб, қариндош-уруғлар, ёру биродарларни зиёрат киладилар, яқинлари ва беморларнинг ҳолидан хабар оладилар. Бирор сабабга кўра аразлашган, гина-кудуратли таниш-билишлар ҳам ҳайит кунларида ўзаро узр сўрашиб, бир-бирларига кучоқ очадилар. Бундай ҳайрли ишлар азалий қадриятларимиздандир. Мусулмонлар фақатгина шу кунларда эмас, балки ийл давомида бир-бирларига бўладиган ўзаро

муомалаю муносабатларни яхши қилмоқлари керак. Аллоҳнинг берган неъматларидан ҳайр-эҳсон қилиб, саҳоватли кишиларимиз меҳрга муҳтоҷ одамларга ёрдам кўлини чўзишлиари керак. Савоб ишни ҳар ким, ҳар куни килиши керак. Ислом дини кишиларни бирбирига меҳру оқибатли бўлишга чақириши билан бирга, уларни динидан, миллатидан қатъи назар, ўзаро иззат-ҳурмат кўрсатишга ундаиди.

Бу йилги Курбон ҳайити жуда шукухли кунларга тўғри келди. Асосий конунимиз қабул қилинганиннинг 20 йиллик байрамига ҳам саноқли кунлар қолди. Ўзбекистон Республикаси Конституциясида Дин ва виждан эркинлиги масалаларига катта эътибор қаратилган.

Ватанимиз мустақилликка эришганидан кейин ҳар йили республикамиздан минглаб мўмин-мусулмонлар муборак ҳаж ибодатини бажариш бахтига мусассар бўлмоқдалар. Уларнинг эмин-эркин, хеч қандай қийинчиликлариз ибодатларини адо этиб, соғсаломат уйларига қайтишлари учун барча шароитлар яратиб берилмоқда.

Курбон ҳайити билан барча юртдошларимизни, қарилик гаштини сураётганд табаррук ёшдаги нуроний отахон ва мунис онахонларимизни чин дилдан муборакбод этиб, Ватанимизнинг истиқболи порлок, юртимиз тинчлиги ва осойишталиги бардавом, ҳалқимиз фаровонлиги янада зиёда бўлишини Яратгандан сўраймиз. Курбон ҳайитингиз кутлуг бўлсин, азиз юртдошлар!

**Ўзбекистон
мусулмонлари идораси**

«HIDOYAT»

Ойлик диний-маърифий,
илмий-адабий нашр

Муассис

Ўзбекистон мусулмонлари идораси

Бош муҳаррир

Нуруллоҳ МУҲАММАД РАУФХОН

Таҳрир ҳайъати

Усмонхон АЛИМОВ

Абдулазиз МАНСУР

Абдураззок ЮНУС

Ортиқбек ЮСУПОВ

Анвар ТУРСУН

Аҳад ҲАСАНОВ

Зоҳиджон ИСЛОМОВ

Абдулҳамид ТУРСУН

Ҳайдархон ЙЎЛДОШХЎЖАЕВ

Баҳодир КАРИМОВ

Эркин МАЛИК

Муҳаммад Шариф ЖУМАН

Исомиддин ОЛИМОВ

Абдул Жалил ХЎЖАМ

(*Бош муҳаррир ўринбосари*)

Муҳтарама УЛУГОВА

Муқова

«Voris Design» маркази билан
ҳамкорликда тайёрланди.

Бадиий муҳаррир

Хайруллоҳ ҚУДРАТЎЛЛОҲ ўғли

Саҳифаловчи

Баҳром ИКРОМОВ

Матнни

Рахима КАРИМЖОН қизи
терди.

Манзилимиз

100002, Тошкент шаҳри
Зарқайнар 18-берк кўча 47^a-йи;

Тел: 240-05-19, 227-34-30.

Интернет сайтимиз: www.hidoyat.uz

Интернет почтамиз: m-nashr@yandex.ru

Ўзбекистон Республикаси Матбуот ва
аҳборот агентлигига рўйхатга олинган.
Гувоҳнома раками 0177.

Босишига 2012 йил 23 октябрда руҳсат
берилди. Босмахонага 2012 йил

24 октябрда топширилди. Қофоз бичими
60x841/8. Адади 47.400 нусха.

2640-сон буюртма. «Sharq» нашриёт-матбаа
аксиядорлик компаниясида босилди.
Тошкент шаҳри, Буюк Турон кўчаси, 41.

Кўллэзмалар қайтирилмайди.

*Муаллифлар фиқри таҳририят нуқтаи назаридан фарқ қилиши мумкин. Кеттиригдан иқтибос
ва рақамлар учун муаллиф масъул. Ҳат юборилганида исмлар тўлиқ, манзил аниқ ёзилсан.
Мақолалар кўчирриб босилса ёки иқтибос олинса,
«Ҳидоят»дан олингани кўрсатилиши шарт.*

Журналимиз саҳифаларида оят ва ҳадислар берилаётгани учун
уни ножсоиз жойларга ташламаслигинизни сўраймиз.



МУНДАРИЖА

Дастурламал

Курбон ҳайитини нишонлаш тўғрисида	1
Кутлов	
Курбон ҳайитингиз муборак бўлсин!	2
Анжуман	
Тинчлик ва осойишталик – олий неъмат	6
Анжуман	
Шайх Абдулазиз МАНСУР Бузғунчи оқимларнинг сохта даъволарига раддиялар	7
Долзарб мавзу	
Айдарбек ТУЛЕПОВ Биладиганлар билан бilmайдиганлар тенг бўлурми?	10
Идора ҳаёти	
Эргаш РУСТАМОВ Масжидлар обод бўлмокда	13
Бугуннинг гапи	
Раҳматуллоҳ САЙФУДДИНОВ Ҳар биримиз масъулмиз	15
Куръон қиссалари	
Кечиккан тавба	16
Насихат	
Фаҳмловчи қалб керак	19
Ёмонликдан қайтариши	
Абдукаҳхор ЮНУСОВ Риёдан сақланайлик	23
Аёллар саҳифаси	
Алоуддин КОСОНИЙ Аёлларга хос ҳукмлар	24
Ўқитувчи ва мураббийлар куни	
Устозларимиз байрами	25
Шеърият	
Ғулом ФАТХИДДИН Сен берган туйғуга, хисга асирман...	
Абдуғани СУЛАЙМОН Болалик	26
Яхшиликка чақириши	
Муҳаммадкарим ИБОЕВ Одамларга фойдамиз тегсин	28
Халқона ўғитлар	
Момоларимиз айтади...	29
Минтақа	
Иқлим ўзгаришлари	30
Ибратли ҳикоялар	
Қалбимнинг бир парчаси	32

Тафсир

Раҳматуллоҳ қори ОБИДОВ

АЛЛОҲНИНГ ЗИКРИ БИЛАН ҚАЛЪЛАР ОРОМ ОЛУР

Аллоҳга тасбех, такбир, таҳлил айтиш, ҳамд, шукр келтириш, дуо ва салавотлар айтиш, Қуръон тиловат қилиш, намоз ўқиш, рўза тутиш, закот, садақа ва инфоқ қилиш ҳамда ҳаж ва умра қилиш айни зикрdir.

Зикр Аллоҳга тазарру бўлгани учун, энг гўзал ҳолда, қиблага юзини бурган, ҳақиқий муҳтож кишилардек, ялиниб-ёлворган ҳолда қилинса, савоби улуғ бўлади.

Саҳобалар ҳаёти

АБУ БАКР СИДДИҚ

(розияллоҳу анҳу)

Анас ибн Молиқдан (Аллоҳ ундан рози бўлсин) ривоят қилинади:
«Набий (ундаги Алоҳининг салоти ва саломи бўлсин), Абу Бакр, Умар ва Усмон (Аллоҳ ундан рози бўлсин) Уҳуд тогига чиқдилар. Шунда тоф тебранди. Набий (ундаги Алоҳининг салоти бўлсин): Эй Уҳуд, тинчлан, сенинг устингда Набий, Сиддик ва икки шахид бордир, деб марҳамат қилдилар».

Масала

СЎРАГАН ЭДИНГИЗ...

Динимиз аёлларни кўчада мақсадиз гап сотиб ўтириш у ёқда турсин, заруратсиз кўчага чиқишидан ҳам қайтарганини айтиб ўтиш керак. Ундан кейин, шом маҳали жин ва шайтонлар изғиб юриши ҳам ҳадиси шарифларда баён қилинган. Болаларнинг инжиқ бўлиб қолиши, уйқусида босинқирашига ҳам ана шу пайт кўчада юриши сабаб бўлади. Шу боис, бу каби беҳуда одатларга барҳам бериб, ўлчовли вақтимиздан унумли фойдаланиш пайида бўлишимиз керак.

18

Хабарлар

ИСЛОМ ВА ОЛАМ

Энг ёши вазир

Йигирма тўққиз ёшли Ҳадия Тоиқ Норвегия маданият вазири этиб тайинланди. Ушбу мусулмон аёл мамлакат тарихида энг ёш вазирдир. У келгусидаги ишлари режаси ҳақида оммавий ахборот восита-ларига баёнот берди.


8

4

20



АЛЛОҲНИНГ ЗИКРИ ОРОМ



الَّذِينَ ءاْمَنُوا وَتَطْمَئِنُ قُلُوبُهُمْ بِذِكْرِ اللَّهِ

۲۸ أَلَا يَذِكْرِ اللَّهِ تَطْمَئِنُ الْقُلُوبُ



Аллоҳ субҳонаҳу ва таоло имон келтирган, Ўзининг амрларига итоатда бўлиб, қайтарган нарсаларидан сақланиб, парҳез қилган инсонлар ҳақида бундай марҳамат қиласи:

«Улар имон келтирган ва қалблари Аллоҳнинг зикри билан ором оладиган зотлардир. Огоҳ бўлинг, Аллоҳни зикр этиш билан қалблар ором олур» (Раъд, 28).

Куръони каримнинг ўн учта сураси ўн олтига оятида зикрга буюрилган. Зикрнинг луғавий маъноси Аллоҳни ёдлашdir. Аллоҳни кўп зикр этган банданинг қалби покланади, имони мустаҳкамланади, дуолари ижобат бўлади, ихлоси ортади. Абу Сайд Худрий (Аллоҳ ундан рози бўлсин) ва Абу Ҳурайра (Аллоҳ ундан рози бўлсин) ривоят қиласи: Пайғамбаримиз (у зотга Аллоҳнинг салоти ва саломи бўлсин) бундай марҳамат қилганлар: «Қайси бир қавм (жамоа) Аллоҳнинг зикри учун йигилса, уларни фаришталар тавоғ қиласидилар, улар-

га Аллоҳнинг раҳмати ёғилади, уларнинг даврасига сакинат (осойишталик) тушади, Аллоҳ уларни Ўзига яқин фаришталар билан бирга ёд этади» (*Ином Муслим*).

Аллоҳга тасбех, такбир, таҳлил айтиш, ҳамд, шукр келтириш, дуо ва салавотлар айтиш, Куръон тиловат қилиш, намоз ўқиш, рўза тутиш, закот, садака ва инфоқ қилиш ҳамда ҳаж ва умра қилиш айни зикрdir.

Аллоҳ таолонинг зикрини адо этиш учун зокир маънавий ва жисмоний жиҳатдан пок бўлиши шарт. Дил ва тил билан бажариладиган зикрлар, масалан, тасбех, таҳлил, таҳмид, такбир, Пайғамбаримизга (у зотга Аллоҳнинг салоти ва саломи бўлсин) салавотлар ва дуоларни таҳоратсиз, жунуб, ҳайзли, нифосли ҳолда ҳам айтавериш жоиз.

Жунуб киши, покланмагунича Қуръон оятларидан хоҳ узун, хоҳ қисқа оят бўлсин, тиловат қилиши ҳаромдир. Йўлда юриб кетаётган ва ҳаммомда ювинаётган ҳолда зикр қилиш мумкин.

Зикр Аллоҳга тазарру бўлгани учун, энг гўзал ҳолда, қиблага юзини бурган, ҳакиқий муҳтоҷ кишилардек, ялиниб-ёлворган ҳолда қилинса, савоби улуғ бўлади.

Абу Ҳурайрадан (Аллоҳ ундан рози бўлсин) ривоят қилинади: Пайғамбаримиз (у зотга Аллоҳнинг салоти ва саломи бўлсин) дедилар: «Муфарридлар зафарга эришдилар». Саҳобалар: «Эй Аллоҳнинг Расули, “муфарридлар” кимлар?» деб сўрашди. Пайғамбаримиз (у зотга Аллоҳнинг салоти ва саломи бўлсин) уларга: «Аллоҳни кўп зикр этувчи эркаклар ва Аллоҳни кўп зикр этувчи аёллар муфарридлардир», деб жавоб бердилар.

Аҳзоб сурасининг 35-ояти каримаси «Аллоҳни кўп зикр қилувчи эркаклар ва Аллоҳни кўп зикр қилувчи аёллар – улар учун Аллоҳ мағфират ва улуғ мукофот (яъни,

БИЛАН ҚАЛБЛАР ОЛУР

жаннат)ни тайёрлаб қўйгандир» тафсирида уламолар турли фикрлар билдиришган. Яъни, «Аллоҳни кўп зикр қилувчилар» деб кимларни айтилади?

Сайд ибн Жубайрнинг (Аллоҳ
унаан роғин
бүлсени) сўзларига кўра, хар бир киши бирор амални бажаришда Аллоҳга итоат, Унинг розилигини топиш нијатида бўлар экан, у одам зокирдир. Абу Сайд Худрий (Аллоҳ
унаан роғин
бүлсени) ривоят қиласди. Пайғамбаримиз (У зотга Аллоҳнинг
салоти ва саломи
бўлсени) дедилар: «Эркак киши ярим тунда ўз аёlinи уйқудан уйғотса, икковлари ҳам икки ракат намозни ўқисалар, улар «Аллоҳни кўп зикр этувчи эркаклар ва Аллоҳни кўп зикр этувчи аёллар» қаторига ёзилади (*Имом Абу Довуд, Насоий, Ибн Можса*).

Имом Абул Ҳасан Воҳидий Ибн Аббосдан (Аллоҳ
унаан роғин
бўлсени) эшитиб, айтган фикрларича, улар беш вақт намоздан кейин ҳам, эрталаб ҳам, кечкурун ҳам, ётган жойларида ҳам, уйқудан уйғонган вақтларида ҳам, уйларидан кетаётган ва қайтиб келаётган вақтларида ҳам Аллоҳни зикр этувчилардир. Мужоҳид айтади: «Тик турганида ҳам, ўтирганида ҳам, ётганида ҳам Аллоҳнинг зикрида

бўлмаган эркаклар ва аёллар «Аллоҳни кўп зикр этувчилар»дан бўлмайдилар». Ато ибн Рабоҳ айтади: «Беш вақт намознинг ҳақларини мукаммал адо этган кишилар «Аллоҳни кўп зикр этувчилар»дан саналади» (*Имом Нававий. “Ал-Азкор”, 10-бет*).

Зикр сабаби билан банда учта марҳаматга эга бўлади:

1. Аллоҳ субҳонаҳу ва таоло Ўзини ёд этган (зикр қилган) банданигина ёд этади:

«Мени зикр этинглар, мен ҳам сизларни зикр этаман» (*Бақара, 152*).

2. Аллоҳ зикрини кўп қилган киши бутун ҳаётида, ҳатто уйқусида ҳам ибодат билан машғул бўлган ҳисобланади:

«Мен инсонлар ва жинларни фақат менга ибодат қилишлари учун яратдим» (*Зориёт, 56*).

3. Аллоҳни кўп зикр қилган киши ҳар қандай қийинчилик ва мashaққатдан нажот топади:

«Бас, агар у (Юнус) Аллоҳга доимо тасбех айтувчилардан бўлмаганида, албатта, у балиқ қорнида қиёматгача қолиб кетган бўлур эди» (*Софват, 143–144*).

Рахматуллоҳ кори ОБИДОВ,

ТИУ доценти,

«Жўрабек» жоме масжиди имом-хатиби





Шу йил 31 август куни “Шаҳидлар хотираси” майдонида бўлиб ўтган сұхбатда муҳтарам Юртбошимиз мамлакатимиздаги тинчлик ва осоийишталиктни асраб-авайлашида имом-хатибларнинг ўрни ва улар олди-даги долзарб вазифалар юзасидан қўмматли қўрсатмалар берган эдилар.

Октябр ойининг 4 куни Тошкент Ислом университетида Дин ишлари бўйича қўмита ва Ўзбекистон мусулмонлари идораси ҳамкорлигида “Тинчлик ва осоийишталиктолий неъмат” мавзууда ўтказилган анжуман давлатимиз раҳбарининг қўрсатмаларини бажариш юзасидан энг муҳим вазифалар ҳақида бўлди. Унда республикамиз жоме масжидлари имом-хатиблири, диний билим юртлари мударрислари, турли ташкилотлар вакиллари қатнашди.

Анжуманни Ўзбекистон мусулмонлари идораси раиси, муфтий Усмонхон Алимов очди.

– Муҳтарам Юртбошимизнинг “Шаҳидлар хотираси” майдонида биз, дин ходимларига билдирган юксак ишончи елкамизга катта масъулият юклайди, – дея сўз бошлади муфтий ҳазратлари. – Давлатимиз раҳбари буғунги имом-хатиб бундан 10–15 йилги имом-хатибдан тубдан фарқ қилиши, ғоялар кураши, ахборот хуружлари авж олган бир пайтда улар ҳартомонлама етук салоҳиятли бўлиши кераклигини айтдилар. Чунки имомдомлаларимиз доимо ҳалқнинг ичиди. Одамлар оқ-корани ажратиб олишда уларга сұяниди, дея таъкидладилар.

Анжуманда сўз олганлар Президентимиз раҳнамолигида виждан эркинлиги таъминланаётгани, миллий ва диний қадриятлар эъзозланаётгани, жамиятда ўзаро ҳурмат ва ҳамжиҳатлик мухити барқарорлигининг муҳим омили бўлаётганини этироф этишди.

Буғунги воқеликка очик кўз ва теран мушоҳада билан қараш, жаҳонда ва ён-атрофимизда кузатилаётган маънавий таҳдид ва хатарларни тўғри баҳолаб, тегишли сабоклар чиқариш зарурлиги таъкидланди. Жумладан, араб мамлакатларида давом этаётган нотинчлик ва қуролли тўқнашувлар сабаб тинч аҳоли азият чекаётгани, муаммолар ечими томонларнинг қуролли қарама-каршиликлардан воз кечиб, музокаралар йўлига ўтишида экани қайд этилди.

– Тинчлик ва осоийишталиктни асраб-авайлаш, ҳимоя қилиш фақат муайян соҳалар хо-

димларининг вазифаси эмас, – деди Тошкент вилояти бош имом-хатиби Курбонали Турсунов. – Бу йўлда барчамиз, бутун ҳалқимиз янада жисп бўлиб, ҳамжиҳатликда ҳаракат қилишимиз керак. Биз имом-хатиблар ҳам ўзимизнинг қасб маҳоратимиз, нутқ маданиятимиз, дунёқараш ва фикр доирамизни кен-

ТИНЧЛИК ВА ОСОЙИШТАЛИК – ОЛИЙ НЕЪМАТ



гайтиришга доимий эътибор қаратишимиз ҳамда мунтазам изланишда бўлишимиз лозим. Муқаддас динимизни асл инсонпарварлик мөҳиятини униб-ўсиб келаётган ёш авлодларимизга тўғри тушунтириш ва Ислом маданиятининг эзгу ғояларини кенг тарғиб этишини долзарб вазифамиз деб биламиз.

Анжуманда тинчлик ва осоийишталиктни янада мустаҳкамлаш, маънавий-маърифий ишларни замон талабларига муносиб давом эттириш, ёшларни турли мағкуравий хуружлардан ҳимоя қилиш, уларда ҳаётга онгли муносабатни шакллантириш, ён-атрофда юз бераётган воқеаларга теран қарашни ўргатишда имом-хатибларнинг муҳим вазифалари белгилаб олинди.

*Ўзбекистон мусулмонлари
матбуот хизмати*

— ۱۰ ۱۴۳۳

БУЗГУНЧИ ОҚИМЛАРНИНГ СОХТА ДАЪВОЛАРИГА РАДДИЯЛАР

Истиклол шарофати билан юртимизда диний ва миллий қадриятларимиз қайта тикланди. Диёrimiz мусулмонларининг асрий орзу умидлари рўёбга чиқди. Лекин, афсус, бу неъматлардан фойдаланиб, шукр ўрнига ношукрлик қиласиганлар, ғанимларимиз ногорасига ўйнайдиганлар, бузгунчи ва мутаассиб оқимларнинг ботил ақидаларига эргашиб, залолатга кетган гумроҳлар ҳам борлиги кишини ранжитади.

Диний билими ўта саёз, турли фитна-фасод кўзгайдиган фикрлар ва ғояларни содда ҳалқ онгига сингдиришга уринадиган чаласавод кимсаларга эргашиб кетмасликлари учун ёшларни тўғри йўлга солиш ва хушёрликка чорлаш, айниқса, биз уламолар, имом-хатибларнинг асосий бурчимиздир.

Хорижийлар, қадарийлар, муржийлар, рофиизийлар, жаҳмийлар ва мўътазила каби фирмә ва оқимлар Исломнинг илк асрларида юзага келган бўлса, XX ва XXI асрларда хизбут таҳрир, нурчилар, салафийлар, жиходчилар, такfirчилар ва хижратчилар каби ўнлаб адашган оқимлар пайдо бўлиб, дунё мусулмонлари ўртасида бузгунчилик қилишяпти. Турли жанжаллар, низолар чиқишига сабаб бўлмоқда.

Хижрат масаласида. Хижрат икки хил бўлади. Биринчиси: дин ва ҳаёт муҳофазаси йўлида амалга ошириладиган маконий хижрат бўлиб, унга тааллукли бир қатор оят ва ҳадислар ворид бўлган. Аллоҳ таоло бундай дейди:

“Зулму қийноқларга дучор бўлганларидан сўнг Аллоҳ йўлида хижрат қилган зотларни, албатта, бу дунёда ҳам гўзал (гўшаларга) жойлаштиurmиз. Энди охират ажри мухофоти янада каттароқ эканини (одамлар) билсалар эди!” (*Наҳъл*, 41).

Шу мазмундаги оятлар Нисо (100-оят), Анфол (74-оят), Наҳъл (110-оят) сураларида бор.

Иккинчиси: гуноҳ-маъсиятларни тарк этиш. Шу маънодаги хижрат тўғрисида Пайғамбаримиз Муҳаммад (у зотга Аллоҳнинг салоти ва саломи бўлсин) бир қатор кўрсатмаларни баён қилганлар. Жумладан, Имом Бухорий ривоят қилган ҳадисда У зот: “Тили ва қўлидан мусулмонлар саломат бўлган инсон ҳақиқий мусулмондир. Аллоҳ таоло қайтарган нарсаларни тарк қилган инсон ҳақиқий муҳожиридир”, дейдилар. Имом Байҳақий Ибн Умардан (Аллоҳ уздан рози) ривоят қилган

Шайх Абдулазиз МАНСУР,
Ўзбекистон мусулмонлари идораси раиси ўринбосари

ҳадисда: “Хижратнинг энг афзали – Раббинг ёмон кўрган нарсани тарк этмоғингдир”, дейилади.

Бузгунчи кучлар таассубга берилган шахсларни дунёнинг нотинчлик ҳукм сурган ва ўзлари кўним топган минтақаларига жамлаш ва шу орқали режалаштирилган геосиёсий мақсадларни амалга оширишга интилмокда. Ҳусусан, улар илм ва маърифатдан йироқ, жоҳил кимсаларни Ислом диёри бўлган, аzon айтиладиган, жума ва ҳайит намозлари ўқиладиган, хуллас, Исломнинг беш аркони эминзаркин адо этиладиган, мусулмонлар тинчлик-хотиржамликда ҳаёт кечираётган Ватанин тарк этишга тарғиб қилмоқдалар. Ваҳоланки, она юртини ташлаб, ўзга юртларда сарсон-саргардон юриш, ўзи каби манқурт шахслар билан бирлашиб, киндик қони тўкилган юртига қарши қурол кўтариш Ислом тълимотига зид экани барчага маълум.

Абдуллоҳ ибн Умардан (Аллоҳ уздан рози будсан) ривоят қилинади: Расулуллоҳнинг (у зотга Аллоҳнинг салоти ва саломи бўлсан) хузурларига бир киши келиб: “Ё Расулуллоҳ, мен ота-онамни йифлаган ҳолида ташлаб, хижрат қилиш учун сизнинг хузурингизга келдим”, дейди. У зот эса: “Отаонангнинг олдига қайтиб, уларни қандай йифлатган бўлсанг, шундай кулдиргин”, деб жавоб берадилар (*Абу Довуд ривояти*).

“Шахидлик” масаласида. Ушбу сўз “хозир, гувоҳ, кўрган-билганлари ҳақида хабар берувчи” маъноларини ифодалайди. Шунингдек, “Шахид” Аллоҳ таолонинг сифатларидан бири бўлиб, “гувоҳлиги ишончли, ҳар доим ҳозир бўлувчи Зот” деган маъноларин англатади.

“Шахид” сўзининг яна бир маъноси ўзга шахс томонидан ноҳақ ўлдирилган мусулмондир. Кишининг ўзини ўзи ўлдириши, гарчи нияти дин йўлида деб эълон этилса-да, “ўз жонига сунқасд қилиш” деб баҳоланади.

Ўзини-ўзи ўлдириш – бу ўз ҳаётини қасддан тўхтатишdir. Шариат нуқтаи назаридан бу ҳаракат қаттиқ қораланади, Парвардигор берган ҳаётга тажовуз қилиш даражасидаги гуноҳи кабира ҳисобланади.

Давоми 14-саҳифада ►►►



Tұлық исми: *Абдуллоҳ ибн Усмон ибн Омир ибн Амр ибн Каъб ибн Саъд ибн Тим ибн Мурра ибн Каъб ибн Луай Күрайший Таймий. Куняси: Абу Бакр. Лақаби: Атиқ ва Сиддик. “Атиқ” дейилишига юзи истарали ва яхшилик қилишида биринчи экани сабаб бўлган.*

АБУ БАКР СИДДИҚ (РОЗИЯЛЛОҲУ АНҲУ)

“Сиддик” деб лақабланишининг сабаби Набийни (у зотга Аллоҳининг саломи бўлсин) тасдиқлаганидир. У Пайғамбаримиз оиласига мансуб бўлмаганлар орасида биринчи бўлиб Набийни (у зотга Аллоҳининг саломи бўлсин) тасдиқлаб, у зотга имон келтирган. Шунинг учун Набий (у зотга Аллоҳининг саломи бўлсин) уни “Сиддик” деб атаганлар. Исро воқеасидан сўнг мушриклар Абу Бакрга: “Дўстингиз бир кечада Маккадан Куддусга бордим”, деб айтяпти”, дедилар. Шунда у: “Рост сўзлабди”, деб тасдиқ жавобини берди. Бу ишонч сўзи ҳам Абу Бакрга “Сиддик” деб ном берлишига асос бўлди. Тафсири “Улусий”да келишича: “Ростликни келтирган зот (Муҳаммад) ва уни тасдиқ этганлар (мўминлар) – айнан ўшалар тақволи зотлардир” (Зумар, 33) оятидаги “Ростликни келтирган зот” Расууллоҳ (у зотга Аллоҳининг саломи бўлсин), “уни тасдиқ этганлар” эса, Абу Бакрдир (Аллоҳ бўлсан), деб тафсири қилинади.

Анас ибн Моликдан (Аллоҳ бўлсан) ривоят қилинади: «Набий (у зотга Аллоҳининг саломи бўлсин), Абу Бакр, Умар ва Усмон (Аллоҳ савиату хотиба бўлсан) Уҳуд тогига чиқдилар. Шунда тоғ тебранди. Набий (у зотга Аллоҳининг саломи бўлсин): Эй Уҳуд, тинчлан, сенинг устингда Набий, Сиддик ва икки шаҳид бордир, деб марҳамат қилдилар».

Айтишларича, онасининг фарзандлари турмаган, Абу Бакр туғилганида у Каъбага юzlаниб: “Аллоҳ, бу Сенинг ўлимдан кутқариб қолганингдир, уни менга ҳадя қил”, деб айтган экан.

Фил воқеасидан икки йилу олти ой ўтганидан сўнг, миодий 573 йили дунёга келган. Абу Бакр Сиддик (Аллоҳ бўлсан) толмадан келган, озгин, юзида туклари кам, дўнгпешонани киши бўлган.

* * *

У Расууллоҳдан (у зотга Аллоҳининг саломи бўлсин) сўнг бу умматнинг энг яхши кишисидир. Набий (у зотга Аллоҳининг саломи бўлсин): “Пайғамбарлардан сўнг куёш чиқиши ва ботишида Абу Бакрдан афзал инсонни кўрмагандир”, дэя марҳамат қилганлар (*Абу Нуъайм*).

Абу Дардодан (Аллоҳ савиату хотиба бўлсан) ривоят қилинади: “Мен Расууллоҳ (у зотга Аллоҳининг саломи бўлсин) хузурларида эдим. Бир вақт кўйлагининг этагини ушулганча Абу Бакр кириб келди, ҳатто тиззалири кўринай деб қолган эди. Буни кўрган Набий (у зотга Аллоҳининг саломи бўлсин): “Дўстларингиз жанжаллашибди”, дэя марҳамат қилдилар. Абу Бакр (Аллоҳ бўлсан): “Умар билан орамизда бир иш ўтди. Тезда ортимга қайтиб бордим. Пушаймон бўлиб, ундан кечирим сўрадим. Умар узримни қабул қилмади. Кейин тўғри сизнинг олдингизга кела-вердим”, деди. Расууллоҳ (алайҳисссалом) уч бора: “Аллоҳ сени кечирсин, эй Абу Бакр”, деб айтдилар. Бу пайтда Умар ҳам қилган ишидан афсусланиб, Абу Бакрнинг уйига борибди: “Абу Бакр борми?” деган сўровига ичкаридан: “Йўқ, Набийнинг (у зотга Аллоҳининг саломи бўлсин) хузурларига кетдилар”, деган жавоб бўлиби. Шундан сўнг у Расууллоҳнинг (у зотга Аллоҳининг саломи бўлсин) хузурига келди.





Пайғамбаримизнинг юзлари ўзгарди. Абу Бакрнинг раҳми келиб, тиз чўқди ва икки марта: “Ё Расулулоҳ, мен зулм қилаётган эдим”, деб айтди. Шундан сўнг Набий (узотга Аллоҳининг
саломи бўлсин) марҳамат қилдилар: “Аллоҳ таоло мени сизларга пайғамбар қилиб юборди, ўшанда: “Сен ёлғон айтяпсан, дедингиз. Абу Бакр эса: “Рост сўзладингиз”, деб мени жони ва моли билан ҳимоя қилди. Дўстимни тинч қўйинглар, бундан сўнг унга ҳаргиз озор берманглар. У имонда сизлардан ўзди. Набийга дўст тутиниб, уни тасдиқлади. Қанчалик қийинчиликларга дуч келмасин, узоқ вақт Маккада мен билан колди ва хижратда шерик бўлди. Абу Бакр ғорда ҳам менга шерик бўлди”, деб марҳамат қилдилар» (*Имом Бухорий*).

* * *

Анас ибн Молик Абу Бакрдан (розияллоҳу анҳумо) ривоят қилди: «Ғорда эканимизда тепамизда турган мушрикларнинг оёқларига қарадим ва: “Ё Расулулоҳ, агар улардан бири оёғи остига қараса, бизни кўради”, деб айтдим. Шунда У зот (узотга Аллоҳининг
саломи бўлсин): “Эй Абу Бакр, икки кишининг учинчиси Аллоҳ бўлган кишилар ҳақида эшитмаганмисан?”, деб марҳамат қилдилар» (*Имом Бухорий*).

Одамлар ўзини Абу Бакрдан устун қўяётганларини эшитган Ҳазрат Умар: “Аллоҳга қасам, Абу Бакрнинг бир кечаси Умарнинг оиласидан яхшироқdir. Абу Бакрнинг бир куни Умарнинг оиласидан яхшироқdir. Расулулоҳ (узотга Аллоҳининг
саломи бўлсин) форга Абу Бакр билан бирга кирдилар. Абу Бакр бир соат Расулулоҳнинг (узотга Аллоҳининг
саломи бўлсин) олдиларида юрса, бир соат у зотнинг орқаларида юрарди. Ҳатто бу иши билан Набийни (узотга Аллоҳининг
саломи бўлсин) ажаблантириди, у зот (узотга Аллоҳининг
саломи бўлсин): “Эй Абу Бакр, сенга нима бўлди? Бир соат олдимда юрсанг, бир соат ортимда юрасан?”, деб сўрадилар. У: “Ё Расулулоҳ, изимидан келишмаяптимикин деб ўйлашим билан орқангиздан юраман, йўл четида бир кузатувчи бормикан деган гап хаёлимга келган заҳоти эса олдингизда ўтаман”, деди. Шунда Набий (узотга Аллоҳининг
саломи бўлсин): “Эй Абу Бакр, агар бирон нарса юз берса, менинг ўрнимга сен бўлишни истармидинг?”, деб сўрадилар. Абу Бакр: “Сизни юборган Зотга қасам, бало сизга эмас, менга етишини истардим”, деб айтди. Форга етишганида эса Абу Бакр ичкарини тозалаб, супуриб чиқди. “Жоним қўлида бўлган Зотга қасам, ана ўша кеча Умарнинг оиласидан афзалдир”, деб айтди (*Ҳоким, Байҳақий ривояти*).

* * *

Кунларнинг бирида Набийнинг (узотга Аллоҳининг
саломи бўлсин) ҳузурларига бир аёл келди, У зот (узотга Аллоҳининг
саломи бўлсин) аёлга бир иш буюрдилар. У: “Ё Расулулоҳ, қайтиб келганимда сизни тополмасам нима қиласай?”, деб сўради. Шун-

да Набий (узотга Аллоҳининг
саломи бўлсин): “Агар мени тополмасанг, Абу Бакрнинг олдига бор”, деб марҳамат қилдилар.

* * *

Умар ибн Хаттобдан (Аллоҳ
уздан рози
саломи бўлсин) ривоят қилинади: «Расулулоҳ (узотга Аллоҳининг
саломи бўлсин) эхсон қилишимизни буюрдилар. Шунда ўзимга ўзим: “Бир куни Абу Бакр мендан ўзиб чикканди, бугун эса мен ўзиб чиқаман”, дедим ва ярим бойлигимни олиб келдим. Набий (узотга Аллоҳининг
саломи бўлсин): “Оилангга нима қолдирдинг?”, деб сўрадилар. Мен: “Худди шунча қолдирдим”, деб айтдим. Кейин Абу Бакр келди. Набий (узотга Аллоҳининг
саломи бўлсин): “Оилангга нима қолдирдинг”, деб сўрадилар. У: “Аллоҳ ва расулини қолдириб келдим”, деб жавоб берди. Шунда ўзимга ўзим: “Аллоҳга қасам, бирон нарсада ундан ўзиб кетолмас эканман”, дедим» (*Имом Термизий*).

Абу Сайд Ҳудрий (Аллоҳ
уздан рози
саломи бўлсин) айтади: «Набий (узотга Аллоҳининг
саломи бўлсин) одамларга хутба қилиб: “Аллоҳ бандага дунёдаги ва Ўзининг ҳузуридаги нарсаларни танлаш ихтиёрини берди. Банда Унинг ҳузуридаги нарсаларни танлади”, деб марҳамат қилдилар. Абу Бакр йиглаб юборди. Биз ҳайрон бўлдик. Билсак, танлаш имкони берилган киши Расулулоҳ (узотга Аллоҳининг
саломи бўлсин) эканлар. Абу Бакр биздан зукко эди. Пайғамбар (узотга Аллоҳининг
саломи бўлсин): “Дўстликда ва молда менга энг кўп хизмати сингган Абу Бакрdir. Агар Аллоҳдан бошқа дўст танлаш имконим бўлганида эди, албатта Абу Бакрни танлаган бўлардим. Лекин Исломдаги бирордарлик ва муҳаббатнинг ўзи етарли...” дедилар (*Имом Бухорий ва Муслим*).

Абу Бакр ҳакида Аллоҳ таоло оят нозил килган: “Тақволи киши эса ундан (дўзахдан) узоқлаштирилур. Қайсики, у мол-давлатини (яхшилик йўлида) сарф қиласидиган бўлса. Унинг (сарф қилувчининг) ҳузурида (зиммасида) бирор кимсага қайтариладиган неъмат йўқdir. У фақат энг олий зот бўлмиш Парвардигорининг «юзи»ни истаб (эхсон қилур). (У) яқинда (киёмат куни ато этилажак мукофотдан) рози бўлур” (*Лайл, 17–21*). *

Расулулоҳ (узотга Аллоҳининг
саломи бўлсин): “Мендан кейин Абу Бакр ва Умарга эргашинглар”, деб марҳамат қилганлар (*Имом Аҳмад, Термизий, Ибн Можса*).

Ҳазрат Умар (Аллоҳ
уздан рози
саломи бўлсин) у хақда: “Расулулоҳ (узотга Аллоҳининг
саломи бўлсин) динимизни топшириб қўйган кишига нега энди дунёмизни топширмаслигимиз керак?!” деб айтган.

* * *

Абу Бакр Сиддик (Аллоҳ
уздан рози
саломи бўлсин) хижратнинг ўн учинчи йили жумадул аввал ойида олтмиш уч ёшида вафот этган.

БУШРО
тайёрлади.

Айдарбек ТУЛЕПОВ,
Ўзбекистон мусулмонлари идораси раиси ўринбосари

Аллоҳ таоло Каломи шариғида илмнинг нақадар улуглиги ҳақида қўп оятларни нозил қилган. Жумладан: «Айтинг: «Биладиганлар билан билмайдиганлар тенг бўлурми?!» мазмунли ояти каримага чукур назар ташласак, моҳиятини тафаккур қилсак, ҳозир жамият ҳаётиди имом-хатибларнинг ўрни-мавзеи катта ва масъулияти эканини ҳис этамиз. Дарҳақиқат, Ислом дини имом-хатиблар зими масига катта масъулият юклайди. Имом-хатиб Аллоҳ таолонинг марҳамати ила диний ва дунёвий илмлардан баҳраманд бўлиб, улуг устоз, мударрис ва муаллимлардан етарли ва зарур билимларни олади. Шунингдек, ибодатларни адо этишида, маросимларни ўтказишида ва динимизнинг эзгу таълимотларини мўмин-мусулмонларга тўрги етказишида уларнинг мухим ўрни бор. Лекин бу ўта масъулияти вазифаларни диний илми йўқ, чаласавод кишиларнинг бажаришга уринишлари салбий оқибатларни келтириб чиқармоқда.

БИЛАДИГАНЛАР БИЛАН БИЛМАЙДИГАНЛАР ТЕНГ БЎЛУРМИ?

ЧАЛАСАВОДЛАР ЕТКАЗАЁТГАН ЗАРАРЛАР

Хозирги кунда жойларда, айниқса, чекка худудларда одамлар орасида «мұлла» ёки «домла» деб танилган чаласавод кимсалар зимдан фаолият олиб бораётгани кузатилмоқда. Масалани чукурроқ ўрганиб, таҳлил қилсак, бу ишлар жуда хато, зарарли эканига амин бўламиз.

Чаласавод, яъни диний ва дунёвий илмларни эгалламаган, тегишли хужжат – шаҳодатномаси йўқ, ўзини ўзи «домла» деб номлаб, шаръий хукмларни билмаган, ҳатто, оддий шаръий масалаларни ҳам англамайдиган хамда тафсир, ҳадис, фикҳдан хабарсиз киши қандай қилиб, мавъиза қилиши ёки шаръий масала айтиши мумкин? Фикҳ илмлари, унга доир манба ва қоидаларни билмаган киши қандай қилиб намоз, рўза, закот, никоҳ ва талоқ каби нозик масалалар хусусида сўз юритиши ёхуд фатво бериши мумкин? Бу нарсалар ақлга сигмайдиган ишдир.

Албатта, бундай чаласавод кишилар, аввал турли жойларда ишлаган, энди узун соқол қўйиб, салла-чопон билан, бир-икки оят ёки ҳадисни ёдлаб ўзларича донолик қиласиган, ўзини «уламо» ёки «мұлла» деб атайдиган кимсалар имомлик вазифаси қанчалик қийин ва масъулияти эканини ҳис қилмайдилар.


Мўмин-мусулмонлар ҳаётига тааллукли масалаларга чаласавод кимсаларнинг аралашуви

қўйидаги жиддий муаммоларни келтириб чиқармоқда.

Биринчидан, улар диёrimiz мусулмонлари ҳанафий мазҳабига риоя этишларини инобатга олмай, ўзлари турли манбалардан ўқиган ёки эшишган бошқа мазҳабларга оид ёки динимиз таълимотларига зид фикрларни гапириб, мўмин-мусулмонлар орасида иккиланишларни келтириб чиқаришяпти. Ҳатто айрим масалаларда ихтилоф, низо ва фитна чиқишига ҳам сабаб бўлишмоқда. Ахир, Қуръони каримда: «**Фитна қотилликдан ҳам ашаддийроқдир...**» (Бақара, 191), деб очиқ айтилган-ку!

Иккинчидан, бундай чаласавод кимсалар турли маросимларда ваъз қилиб, диний хукмларни нотўғри талқин этиб, қўпол ҳатоларга йўл қўймоқдалар. Ҳатто, бу борада бошқалар билан баҳс-мунозараларга ҳам киришадилар. Аллоҳ таоло бундай дейди: «(Эй инсон!) Ўзинг (аниқ) билмаган нарсаларга эргашма! Чунки қулоқ, кўз, дил – буларнинг барчаси тўғрисида (хар бир инсон) масъул бўлур (жавоб берур)» (Исро, 36).

Учинчидан, чаласавод кишиларнинг ўзбошимчалик билан никоҳ шартларини сўраб-суриштирмай, тиббий кўрик хulosasi ва ФҲДЁ бўлиmlари гувоҳномасини олмаган, энг ачинарлиси, белгиланган никоҳ ёшига ҳам тўлмаган ёшларнинг никоҳини ўқиши оқибатида турли салбий ҳолатлар юз бермоқда. Масалан, она ва бола саломатлигига жиддий зиён етмоқда,



улар бир умр ногирон ёки жуда заиф бўлиб қолмоқда. Агар, Аллоҳ асрасин, улар орасида ажрим бўлса, келин ўз ҳуқуқларини мутлақо ҳимоя қилолмай қолади.

Шаръий никоҳ шартларига фуқаролик ҳолатлари бўйича далолатнома ёзиш гувоҳномаси бўлишини ҳам асосий шартлардан бири деб эътироф қилиш жуда мухимдир. Чаласавод кишиларнинг фуқаролик ҳолати бўйича далолатнома ёзиш гувоҳномасини суриштиrmай, никоҳ ўқиши ёш оиласарнинг ижтимоий ҳуқуқларини камситиш бўлса, расмий имомларнинг фуқаролик ҳолати бўйича далолатнома ёзиш гувоҳномасини сўраб, сўнгра никоҳ ўқиш, ҳуқуқий жамиятда ёш оиласарнинг ижтимоий ҳуқуқини муҳофаза қилишдир. Эрта турмуш қурғанлар, вояга етмаганларнинг аксарияти ё ота-онасининг қарамогида яшайди ёки турмуши дарз кетади. Бу борада ёш қизларнинг турмушдан кейинги ҳаёти нисбатан оғир кечади. Эрта ҳомиладорлик, нимжон бола туғилиши, рўзгор юмушларидаги уқувсизлиги туфайли эшитадиган таънаю дашномлар охирокибатда унинг тинкасини куритиб қўяди.

Тўртингчидан, чаласавод кимсалар талок масаласини пала-партиш ҳал қилиши натижасида эр ва хотин ўртасида қайта ярашиш имконияти йўққа чиқмоқда. Шунингдек, улар бундай нозик масала диёrimизда Ўзбекистон мусулмонлари идораси Фатво хайъати томонидан ҳал этилишини инобатга олмай, моддий манфаат кетидан кувиб, ўзбошимчалик билан бундай қалтис ишга қўл урмоқда. Бундан ташқари, уларнинг юртимиздаги мавжуд тартиблар ва Ислом дини талабларига амал қилмай, кўпхотинликка ҳам никоҳ ўқиши оқибатида оиласар пароканда бўлиб, болалар тирик етим қолмоқда. Бундай салбий ҳолатларни бартараф қилиш барчамизнинг вазифамиздир.

ИМОМ-ХАТИБ ҚАНДАЙ БЎЛИШИ КЕРАК?

«И мом» арабча сўз бўлиб, тўғри йўлга бошловчи, пешво маъносини билдиради. Шунингдек, ўзида савоб ишларни мужассам қилган инсон маъносини ҳам англатади. Демак, бир сўз билан айтганда, имом кишиларни эзгу мақсадлар сари етакловчи ва ҳидоятга йўлловчидир. Куръони каримда айни шу маънони ифода этувчи бир қанча оятлар бор:

«Эсланг, Иброҳимни бир неча сўзлар билан Рабби имтиҳон қилганида, уларни мукаммал адо этди. Шунда (Аллоҳ): “Албатта, Мен сени одамларга имом (пешво) қиламан”, деди...» (Бақара, 124).



“Биз (Иброҳимга) Исҳоқни ҳадя этдик ва Яъқубни ҳам (набира қилиб) қўшиб бердик ҳамда барчаларини солиҳ кишилар қилдик. Яна уларни Бизнинг амримиз билан (одамларни) ҳидоят этадиган пешволар қилдик ва уларга яхши амаллар қилишни, намозни баркамол адо этишни ва закот беришни вахий қилдик» (Анбиё, 72–73).

Оятлар мазмунидан шундай хулоса чиқариш мумкин, имомлик вазифаси юқори мартабадир. Иброҳим (у зотга Аллоҳинни саломни бўлсан) кўп имтиҳонлардан муваффақиятли ўтганларидан кейин Аллоҳ таоло иноят қилиб, имомлик вазифасини ато этган. Маълум бўладики, ҳар қандай кишига имом деб эргашиб бўлмайди. У катта синовлардан ўтган солиҳ киши бўлиши лозим. Имомнинг масъулияти ва вазифаси ҳам оғир бўлади. Имом одил, қалби пок, бутун вужуди билан кишиларга хизмат қилиши, одамлар эса унинг сўзига итоат этиши, илм сохиби ҳамда молу дунёга ўч бўлмаслиги керак. Имомлик мансаб ҳам, лавозим ҳам эмас, у юксак мартабадир.

Куръони карим оятларида имом яхшиликка бошловчи маъносида қўлланганини ҳам алоҳида таъкидлаш лозим. Шу боисдан, кўп оятларда келтирилган “имом” сўзи расуллар ва пайғамбарларга йўналтирилган. Расуллар ва пайғамбарларнинг табиатида эса факат ҳидоят, итоат, имон каби фазилатлар бор, холос.

Демак, имом ҳидоятга бошловчи ёки эзгу ишларга йўллайдиган шахсдир. Пайғамбарлар, уламолар ва солиҳ кишилар хайрли ишларнинг имоми ва пешвосидир.

Уламолар ўз китобларида имомлик масаласига маҳсус боблар бағишлишган. Абул Ҳасан Али ибн Муҳаммад Мовардий бундай деган: “Барча кишилар имомнинг фикрини қўллаб-қувватлайди. Шу тариқа, имомлик уларга бир пойdevor каби бўладики, элу юрт ва дин қоидалари ўша пойdevor асосида барқарорликка эришади...”. Фахриддин Розий



имом кўп кишилар орасидан танланган бир шахс эканини уқтирган.

Ибн Халдун имомлар мўмин-мусулмонлар ибодатига раҳбарлик қилиш билан бирга дунё ишларида ҳам, маданий ва ижтимоий жамиятнинг мазмун-моҳиятини тўла очиб беришда ҳам ўзига хос ўринга эга эканини баён қилган. Бу эса инсонларнинг икки дунё саодатига эришишида алоҳида аҳамият касб этади.

Аббосийлар даврида ибодатларга маҳсус диний таълим олган киши бошчилик қилиши белгилаб қўйилган. Шу тариқа, ушбу одат қоидага айланган.

Юқоридаги келтирилган оятлар ва фикр-мулоҳазалардан хulosса қилиб айтсак, **имом – диний ўқув юртларидан бирини тамомлаган, илмли, диёнатли, яхши ахлоқли, адолатли, шариат аҳкомларига оғишмай амал қилувчи ва мамлакатдаги ислоҳотларни тўғри тушунган ҳамда диний раҳбарият тавсияси асосида тайинланган кишииди.**

Шуни ҳам таъкидлаш жоиз, жамиятимизда «имом» ва «имомлик» тушунчалари кўп қўлланилади. Уларни айнан инсонларни Куръони карим ва ҳадиси шарифда белгилаб берилган кўрсатмаларга оғишмай амал қилишга чорловчи, хайрли ишларга ундовчи ва юртда кечётган ислоҳотларни онгли тушунувчи киши маъноларида ишлатамиз.

Юқорида айтилганлардан келиб чиқкан ҳолда, имомлик нафақат диний, балки дунёвий, ижтимоий мазмунга ҳам эга эканини эътибордан чиқармаслик керак. Ҳақиқатан ҳам, “имом” сўзи ижтимоий жараённинг бориши ва йўналишига хисса қўшувчи, ҳалқ пешвоси деган маънони билдиради.

Мамлакатимизда имом-хатибларнинг ҳар томонлама намунали бўлишлари ва улар мўмин-мусулмонлар эҳтиёжини тўла қондиришлари борасида жуда кўп ишлар қилинмоқда. Аввало, улар диний ўқув юртларида ўқитилади. Сўнг билим-кўнкимларини мунтазам ошириб боришлари учун Президентимиз ташабbusлари билан Самарқанд вилоятида Имом Бухорий ҳалқаро маркази ташкил этилган.

Юртбошимиз ушбу марказда имом-хатиблар билан учрашиб, жумладан, бундай деганлар: **«Имомлар ҳар доим ҳалқ ичида бўлиб, буюк аждодларимизнинг бой илмий ва маънавий меросларини, муборак Ислом динининг асл мазмун-моҳиятини, Куръони каримдаги юксак ғояларни, айниқса, ақидавий масалаларни чин маънода кенг ҳалқ оммаси онги ва қалбига тўғри ҳолда**

етказадиган, уларни ҳидоят йўлларига бошлайдиган масъул кишилардир”.

Хозирги давр имомлари нафақат диний, балки дунёвий билимларга ҳам эга бўлишлари лозим. Улар бундан ўн беш, йигирма йил аввалги имомлардан тубдан фарқ қилиши керак. Истиқлол ва замон талаби шуни тақозо этмоқда. Шунинг учун ҳам имом ўз устида мунтазам ишлаши, касб маҳорати, билим савиясини ошириб бориши зарур. Шунингдек, мамлакатимизда кечаётган турли ислоҳотлар, воқеа ва ҳодисалар, ҳалқаро ҳаётдан доимий равишда хабардор бўлиши ҳамда буларни кенг ҳалқ оммасига тўғри етказиши керак. Шундагина имом ҳақиқий пешво мақомини олади ва ҳалқ ҳурматини қозонади.

Шайх Абдулазиз Мансур ҳазратлари имом-хатиблар ҳақида куйидаги фикрларни айтадилар: “Мўмин-мусулмонлар учун имом-хатибининг ҳар бир сўзи ва иши ибратdir. Шунинг учун имомлар жамоат жойларида, ҳалқ ичида намуна бўлишлари лозим. Ҳаёт шундай, оддий одамда ҳар қанча камчилик бўлса, бошқалар унга катта эътибор бермайди. Аммо элга панду насиҳат қиласиган имом-хатибларда андак нуқсон сезилса, ҳалқ кўнглида, бу имом оммани бир ишга даъват қиласа экан-у, ўзи бошқа ишни қиласкан, деган шубҳа пайдо бўлади. Шунинг учун имом-хатиблар барча яхши ишларда намуна, камтарлик, сахийлик каби фазилатларга эга бўлишлари лозим”.

Ахборот ва глобаллашув замонида хизмат қилаётган барча имомлар ҳалқ орасида янгиликлардан вақтида хабардор, кишиларнинг муаммо ва ташвишларига ҳамдард бўлган ҳолда ўзларининг маърифатлари, илму ирфонларини муттасил равишда бойитиб боришлари керак.

МАСЖИД ИМОМИ ВАЗИФАЛАРИ

Масжид имом-хатибининг руҳий-маънавий ҳаётда ўзига хос ўрни бор. Масжиддаги тартиб, файз, аҳил-иноқлик имом-хатибга боғлиқ. Имом масжид қавми маънавий тарбияси, одоб-ахлоқ, барча инсоний фазилатлар билан зийнатланишида уларга асосий кўмакчи ва холис хизматчиидир. Имом бор вужуди, ихлоси билан икки дунёда саодат аҳлидан бўлишлари йўлида, уларни юксак одоб-ахлоқ, чиройли амалларни қилишга, адолатли ишларга, фойдали илм-маърифат ўрганишга, инсоний маданият ютуқларидан ижобий суратда истифода

МАСЖИДЛАР ОБОД БЎЛМОҚДА

Сурхондарё вилояти республикамизнинг жанубий чегара ҳудудида жойлашган. Совет даврида бу ерда масжидлар бармоқ билан санаарли эди. Истиқлол йилларида республикамизнинг бошқа вилоятларида бўлгани каби Сурхондарёда ҳам масжидлар кўпайди, уларда ибодат қилиш шаротлари тубдан яхшиланди.

Шунинг учун ҳам имомдан улуғ вазифа – минбар, меҳроб масъулиятини бор вужуди билан хис этиши талаб этилади.

Муҳтарам имом-хатибларимиз, меҳроб ва минбар меросхўрлари ўзларининг жамиятда тутган ўринларини ва масъулиятларини яхши билишлари керак. Улар диний ва дунёвий билимлари, маълумотларини узлуксиз янгилаб боришлари, ўқиш ва ўрганишдан асло тўхтамасликлари керак. Зоро, илму маърифат қирғоғи йўқ буюк уммондир.

Имом-хатибнинг ҳафталик жума мавъизасида уни эшитувчи намозхонлар савияси юқорилиги, уларнинг маданияти тараққий топгани нуқтаи назаридан ҳам кўп мутолаа қилиши, диний ва дунёвий, тарихий, инсоний ва бошқа маърифатлардан ҳам яхши маълумотга эга бўлиши талаб этилади. Имомга бу ишларни амалга оширишида, чукур билим соҳиби бўлишида, албатта, унинг холис нияти ва ихлоси асосий таянч ҳисобланади. Имомнинг ҳар бир айтган сўзи эшитувчига этиб бориши ва унинг қалбида маҳкам ўрнашувида бу икки омил муҳимдир.

Имомнинг айтган гапи ўзининг сурати бўлиши, юксак одоб-ахлоқини акс эттириши керак. Бунинг акси бўлишидан Худо асрасин! Зоро, бу ҳақда Аллоҳ таоло бундай дейди: «Эй имон келтирганлар! Сизлар нега ўзларингиз қилмайдиган нарсани (қилдик ёки қиласиз деб) айтурсизлар?» (Саф, 2)

Шундай экан, бугунги кун имомлари зиммасидаги масъулиятни чукур хис қилган ҳолда диний маърифатни оммага етказишлари, ижтимоий ҳаётда фаол иштирок этишлари, Ватан равнақи, юрт тинчлигини таъминлаш ва халқ фаровонлигини оширишга муносиб ҳисса қўшишлари зарур.



қулайликларга эга маъмурият бинолари, кенг ва ёруғ хонақоҳлар, таҳоратхоналар фойдаланишга топширилди. Вилоят вакиллиги 2013 йилнинг биринчи ярмигача қолган жомеларда ҳам таъмирлаш ишларини тугаллашни режалаштирган.

Бугун вилоят аҳли кенг ва ёруғ жоме масжидларда эмин-эркин, Яратганга шукроналар айтиб, ибодат қилмоқда. Кекса отахонлар дуоларида юртимизнинг тинчлиги, халқимизнинг фаровонлигини сўрашади. Имом-хатиблар ўқув даргоҳларида, маҳаллаларда ўтаётган тадбирларда келажагимиз бўлган ёш авлодга Ислом динининг асл инсон-парварлик моҳиятини тушунтиришмоқда. Отаонани хурматлаш, Ватанни севиш, илм ва хунар ўрганиб, ҳалол ризқ топиш каби эзгу ишларга йўлловчи ножӯя йўлларга қадам босишнинг аянчли оқибатларини тушунтирувчи маърузалар қилишяпти. Шунингдек, вилоят масжидлари ёрдамга муҳтож оиласлар, ёлғиз қариялар, bemorlararga беминнат хайрия ёрдамлари кўрсатмоқда.

Эргаш РУСТАМОВ,
Сурхондарё вилояти боши имом-хатиби



БУЗГУНЧИ ОҚИМЛАРНИНГ СОХТА ДАЪВОЛАРИГА РАДДИЯЛАР

◀◀ Давоми. Бошланиши 7-саҳифада

Аллоҳ таоло огохлантиради: “**Кимда-ким қасддан бир мўминни ўлдирса, унинг жазоси жаҳаннамда абадий қолишдир. Яна унга Аллоҳ газаб қилгай, лаънатлагай ва унга улкан азобни тайёрлаб қўйгай”** (*Niso*, 93).

Абу Ҳурайрадан (Аллоҳ унвони бўйсиз) ривоят қилинган ҳадисда Пайғамбаримиз (у зотга Аллоҳинн салоти ва саломи бўйсиз) айтдилар: “Ким тоғдан ташлаб ўзини ўлдирса, у жаҳаннам ўтида абадий, доимий йиқилиб азобланади. Ким заҳар ичиб, ўзига суиқасд қилса, жаҳаннам ўтида кўлидаги заҳарни ичган ҳолда абадий азобланади.



ди. Ким ўзини темир билан ўлдирса, жаҳаннам ўтида темирини қорнига урган ҳолда абадий азобланади” (*Имом Бухорий*).

Ҳозир баъзи гурӯҳ ва шахслар “ўзини ўлдириш” тушунчасини шаҳидлик билан кориштириб талқин қилишяпти. Шахснинг маълум мақсадлар йўлида “ўзини ўзи ўлдириш” и “шаҳидлик амалиёти” деб баҳоланиши айни адашишдир. Ёвуз ниятли кучлар ўз ҳаракатларини оқлаш мақсадида келтирган барча далилларни Ислом уламолари қоралашган ва асоссиз деб топишган.

Жиҳод масаласида. Ушбу сўз араб тилидан таржима қилинганда “ғайрат қилмоқ”, “ҳаракат қилмоқ”, “интилмоқ”, “зўр бермоқ”, “бор кучини сарфламоқ”, “курашмоқ”, “мехнат қилмоқ” каби маъноларни ифодалайди.

Дастлаб “жиҳод” дейилганида Исломни ҳимоя қилиш ва ёйиш учун кураш тушунилган. Бу сўзнинг истилоҳий маъноси “дushmanдан ҳимояланишда қўли, тили ёки кучи билан курашишдир”. Ибн Рушд “Муқаддимот” асарида жиҳоднинг турларини тўрт қисмга ажратади: қалб, тил, қўл ва қилич билан курашишдир.

Умумий қилиб айтсак, жиҳод нафсга, шайтонга, босқинчиликка ва барча ёвузликларга қарши курашишдир.

Макка даврида Пайғамбаримиз (зотга Аллоҳинн салоти ва саломи бўйсиз) Аллоҳ таолонинг: “(Эй Муҳаммад), **Раббингизнинг йўлига (динига) ҳикмат ва чиройли насиҳат билан даъват қилинг!** Улар билан энг гўзал услугда мунозара қилинг!” (*Наҳл*, 125) деган кўрсатмаси асосида фаолият олиб борганлар. Сўнгра Макка мушрикларидан қасос олиш нијатида улар билан жанг қилишга руҳсат берилди. Аммо булар босқичма-босқич, сиёсий вазият тақозосига кўра нозил бўлган илохий кўрсатмалар эди. Зоро, ўша пайтда мусулмонларга қарши бўлган Макка мушрикли Ислом динини йўқ қилиш, барпо этган жамиятларини эътироф этмай, уларни тор-мор қилиш мақсадида амалий ҳаракатларни олиб бораётган эди.

Агар “жиҳод” Ислом давлатини қуриш учун ёки инсонларни динга киришга мажбурлаш учун жорий этилганида эди, Расулуллоҳнинг (зотга Аллоҳинн салоти ва саломи бўйсиз) ўzlари бу борада намуна кўрсатган бўлур эдилар. Яъни, у зот биринчи бўлиб Маккадаги мушрикларнинг катталари билан урушар, Ислом давлатини барпо этиш учун жиҳод эълон қиласдилар. Бироқ Пайғамбаримиз (зотга Аллоҳинн салоти ва саломи бўйсиз) бундай йўл тутмадилар. Аксинча, мусулмон жамияти тинч йўл билан табиий равища юзага келгач, унинг ҳимояси учун жиҳодга чиққанлар.

Мана шу сабабли ҳам мусулмонлар Ватани ва динини ҳимоя қилиши учун жиҳод жорий этилганини хулоса қилсак бўлади. У йўқ нарсанни амалга ошириш учун эмас, балки бор нарсанни ҳимоя қилиш учун жорий қилинган.

Ҳозир эса бузгунчи тоифалар ўzlари илгари сурәтгандек яниш мақсадида янги “жиҳод” турларини ўйлаб топиб, улардан фойдаланишга уринмоқдалар. Улар кўпгина мусулмонларнинг Ислом аҳкомларини билмаслиги, илмий савияга эга эмаслигидан фойдаланиб, “жиҳод – муқаддас уруш” деган тушунчани тарғиб қилиб, ноҳақ қон тўкилишига сабабчи бўлишади. Бунга дунёning турли чеккаларида “жиҳод” никоби остида содир этилаётган қўпорувчилик ҳаракатлари мисол бўла олади.

(Давоми келгуси сонда.)

Ҳеч кимга сир эмас, бугун маънавий таҳдида, ёшлар онгини эгаллашга қаратилган ахборот хуружлари авж олди. Баъзи бир оқимлар бу йўлда замонавий технологияларни, айниқса, интернетни асосий қурол қилиб улгурди. Чунки у билан ёшларга таъсир ўтказиш осон. Интернет уларга ахборот хуружларини ўюшибтириши, ёлғон ахборот тарқатиши, ижтимоий онгни бошқариши, миллий-маънавий қадрияларни емириши, миллийлигимизга мутлақо ёт гояларни тарғиб этиши, халқнинг тарихий хотирасини бузиши кабиларда жуда қўл келмоқда.

ҲАР БИРИМИЗ МАСЪУЛМИЗ

Маълумот ўрнида айтиш мумкин, ҳозирда ер юзидағи ҳар тўртта одамдан биттаси интернет хизматидан фойдаланар экан. Ёш авлоднинг тўқсон фоизининг асосий ахборот манбаи ҳам интернет. Айни пайтда интернет тармоғида ўз жонига қасд қилишнинг осон йўлларини тарғиб қилувчи ва ҳаёсиз мазмундаги минглаб сайтлар бор. Яна минглаб зўравонлик ва ёвузликни тарғиб қилувчи компьютер ўйинлари кўп. Бугун Оврупада ёшлар бу каби сайtplарнинг домига оммавий равишда тушиб бораётгани ҳеч кимга сир эмас. Ахборот замонида масофалар аҳамиятсиз. Ўзбекистонда ҳам интернетдан фойдаланувчилар сони кун сайин ўсиб бораётгани, айниқса, ёшлар бундан кенг фойдаланиши барчамизни янада огоҳ ва сергак бўлишга ундейди.

Мухтарам Юргбошимиз ўтган йили Матбуот ва оммавий ахборот воситалари ходимларига йўллаган табриклинида: "...Такрор бўлса-да, айтмоқчиман – ахборот оламида қандайдир девор ўрнатиш, ўз қобигига ўралиб, маҳдудликка юз тутиш йўли бизга асло маъкул эмас. Шу билан бирга, бугун ён-атрофимизда, узок-яқин минтақаларда юз берадётган воқеаларни инобатга оладиган бўлсак, ҳали онги, ҳаётий қарашлари шаклланиб улгурмаган ёшларни чалғитишига қаратилган баразли кучлар ҳам интернет имкониятларидан ўз манфаатлари йўлида фойдаланишга уринаётгани ва бундай интилишларнинг қандай салбий оқибатларга олиб келиши мумкинлигини эътибордан соқит қилиб бўлмайди", – дея таъкидлаган эдилар. Бу сўзларнинг ҳақиқат эканига ўзимиз гувоҳ бўлиб турибмиз. Бугунги кунда дунёning турли минтақаларида, хусусан, араб мамлакатларида содир бўлаётган нохуш воқеалар айнан ахборот хуружларининг маҳсулидир. Турли мажаролар, қарама-қаршиликлар, тўқнашувлар қайси юргда бўлмасин, бизга тинчлик бермайди. Бунинг учун мўмин бўлишнинг ўзи кифоя. Чунки мўмин одам ўзи яхши кўрган нарсасини бировга

хам илинади. Бирорнинг бошига мусибат тушса, уйда тинч ўтиrolмайди.

Шу ўринда Юргбошимиз 2012 йил 31 август – Қатағон курбонларини ёд этиш куни муносабати билан Тошкентдаги "Шаҳидлар хотираси" ёдгорлик мажмуида Шарқ мамлакатларида содир бўлаётган воқеалар ҳақида айтганларини бир эслайлик: "Дилни хира қиласидан бундай воқеалар биздан узокда, деб унга лоқайд қараш хомхаёлликдир. Нега деганда, бундай бало бир мамлакат ёки минтақа доирасида чегараланиб қолмайди, вактида бартараф этилмаса, тобора кучайиб, бошқа мамлакат ва минтақаларга ҳам ёйилиши мумкин".

Мухтарам Юргбошимизнинг ўша куни айнан биз дин ходимлари учун айтган ушбу гапларини менимча ҳар биримиз ён дафтари мизга ёзіб, ҳар куни амал қилишимиз зарур:

"Халқимиз, айниқса, ёшларимиз ўртасида тинчлик ва барқарорликнинг қадрига этиш, дунёning турли мамлакатларида кечадётган ўзгариш ва воқеалар хусусида, уларнинг асл сабабларини тушунтириш ишларини олиб бориша имом-хатибларнинг ҳам ўрни ва аҳамияти катта бўлмоғи зарур.

Шуни алоҳида таъкидлаш жоизки, бугунги имом-хатиблар бундан 15–20 йил олдингиларидан жиддий

фарқ қиласиди. Самарқанддаги Имом Бухорий мажмуаси қошида ташкил этилган ўкув маркази бу борада муҳим аҳамият касб этмоқда. Бугун дин вакиллари ҳам юрт тақдирига дахлдорлик хисси билан яшаб, ён-атрофда содир бўлаётган воқеалардан доим хабардор, огоҳ бўлиб бормоқда. Шу азиз Ватанимизни кўз қорачигидек асрар, унинг тинчлиги ва барқарорлигини химоя қилиш, салоҳиятини янада юксалтириш барчамизнинг мамлакатимизда яшаётган ҳар бир инсоннинг муқаддас бурчидир".

Ушбу сўзлар менимча ҳар бир дин ходими қалбида ишонч ва масъулият хиссини уйғотади. Биздан талаб этиладигани – огоҳлик ва яна огоҳлиқдир. Турли ахборот хуружларидан ёшларимизни химоя қилиш. Атрофга хушёр бокиб, воқеа-ходисалардан тўғри хулосао сабоклар чиқариш ва одамлар онгига сингдиришдир.

Рахматуллоҳ САЙФУДДИНОВ,
“Хўжас Аламбардор”
жоме масжиди имом-хатиби





Миср ери кенг бўлса-да, Бани Истроилга торлик қилди. Мисрнинг ҳосилдор ва унумдор ерлари энди уларга кераксиз бўлиб қолди. Ахир улар зинданда, ҳар куни азоб ва хўрланишнинг янги турини татиб ётган бўлсалар, қачонгача сабр қилишарди?

Аллоҳ таоло Мусога (у зотга Аллоҳнинг
саломи бўлсин) Бани Истроил билан тунда Мисрдан чиқиб кетишни ваҳий қилди. Буни Фиръавннинг одамлари сезиб, керакли жойларга етказишиди, керакли тадбирлар кўрилди. Мусо (у зотга Аллоҳнинг
саломи бўлсин) Бани Истроил билан кечаси Фаластин томон юрдилар. Одамлар ўн икки гурухга бўлинib, ҳар бирига йўлбошчи

қириб ташлагандек қириб ташлаши учун олиб келганмидинг?! Ахир бу ердан қочиб қутулишнинг иложи йўқ-ку?! Осон қўлга тушишимиз учун денгиз қирғогига олиб келдингми? Сенга ёмонлик қилганимизни эсламаймиз. Хўш, унда бу интиқомнинг сабаби нима?! Бу ерга келгунимизга қадар сен туфайли бизга етган бало-офатлар етмасмиди?! Мана, олдимизда душман каби денгиз, ортимизда эса денгиз каби душман турибди. Ўлимдан бошқа чорамиз қолмади!”

Дунё Бани Истроилнинг қўзига қоронғу бўлди, нигоҳлар маъюс тортди, кўнгилларни

КЕЧИККАН ТАВБА

тайинланди. Мусо (у зотга Аллоҳнинг
саломи бўлсин) Шом йўлидан икки марта ўтган, йўлни яхши билардилар. Бироқ Аллоҳнинг иродасига кўра, Мусо (у зотга Аллоҳнинг
саломи бўлсин) ва йўлдошлари адашиб қолишиди.

Карвондагилар шимол томон кетяпмиз деб ўйлаб, тун зулматида шарқ томон юришибди. Рўпарадан тўлқинлари мавж уриб турган Қизил денгиз чиқиб, йўллари тўсилди.

“Эй сақлагувчи Эгам! Эй асрагувчи Эгам! Қаердамиз ўзи?!” “Биз денгиз олдидамиз”, деган жавоб бўлди. Ортларида эса бутун уфқни чанг-тўзонга тўлдириб келаётган улкан қўшинни кўришди. Мана шу фурсатда у ер-бу ердан норозилик овозлари кўтарили: “Эй Имрон ўғли! Бизни ўлимга етаклаб келибсан-ку! Биздан нима ёмонлик кўрган эдинг! Фиръавн бизни сичқонларни

умидсизлик эгаллаб олди, овозлар ҳам тинчили. Одамлар эс-хушини йўқотди.

Лекин Мусонинг (у зотга Аллоҳнинг
саломи бўлсин) Раббисига бўлган имони қалбини изтиробга туширмади: «(Мусо) айтди: “Йўқ, мен билан бирга Парвардигорим бор. Албатта, У мени (хавфсиз) йўлга бошлар”» (Шуаро, 62).

Аллоҳ таоло Мусога ҳассаси билан денгизга уришни амр қилди. Урганида эса денгиз ёрилиб сув икки тарафга баланд тоғ каби кўтарили. Ўн иккита гуруҳ учун ўн иккита йўл пайдо бўлди. Қавм саломатлик билан қуруқликка етиб олди.

Фиръавн Бани Истроил денгизни саломат кесиб ўтганини кўргач, аскарларига: “Анави қочоқларни тутиб олишим учун денгиз амримга қандай бўйсунганини кўряпсизларми?” деди.



Бани Истроил яна бетоқат бўлди: “Анави душманлар, анави золимларни қаранглар, олдимизга ўтишмоқчи. Уларни биздан ҳеч нарса тўсолмайди, тезда бизга етиб олишади, ё Мисрга хўрлаш учун асир олиб кетишади, ё бу кимсасиз, овлоқ ерларда ўлдириб юбориша-ди”. Шунда Мусо (у зотга Альханинга саломи бўлсин) денгизнинг олдинги ҳолига қайтишини истаб, асосини куруқликка урди. Лекин Аллоҳ унга: Денгизни тинч ҳолда тарк эт, “**Улар гарқ қилинувчи қўшиндир**” (*Духон*, 24) дея ваҳий қилди.

Фиръавн ва одамлари етиб келганларида, қуруқлик бўлиб турган денгиз уларни ўраб олди. Фиръавн ўлими яқинлашганини сезди: «**Унга (Фиръавнга) гарқ бўлиш** (соати) етишганида айтди: “Имон келтирдим, Истроил авлоди имон келтирган Зотдан ўзга илоҳ йўқдир. Мен ҳам мусулмонлардан-ман”» (*Юнус*, 90).

«Гуноҳ ишларни қилиб юриб, қачонки, бирорталарига ўлим келганида, “Энди тавба қилдим” дейдиган, шунингдек, кофирилигича ўлиб кетадиганларнинг тавбалари эса қабул қилинмагай. Ана ўшалар учун аламили азобни тайёрлаб қўйғанмиз» (*Нисо*, 18).

“Раббингиз белгиларидан баъзиси келган куни эса, олдин имон келтirmagan ёки имонида яхшилик ортирган жонга (бу) имони фойда бермайди” (*Анъом*, 158).

Шунда унга дейилди: (Аллоҳ деди): «**Эндими?! Ахир, сен илгари итоатсизлик қилган эдинг ва бузғунчилардан эдингку!»** (*Юнус*, 91).

Фиръавн чўкиб кетди. Минглаб чақалоқларни ва кишиларни сўйиб ўлдириган золим ўлди. Минглаб дўстларни қамоқта ташлаб, осиб ўлдириган, ҳаддан ошган кимса ўлди. Ўзининг тахтидан йироқда, сultonлигидан олисда ўлим топди. Даволовчи табиби, кўнгил сўровчи дўсти ва ҳолига йиғловчи қариндоши топилмади.


Бани Истроил Фиръавн ўлганидан гумонда эди. Чунки “Фиръавн ўлмайди” деган гапга ишонишарди. “Ахир унинг кунларни овқатсиз ва шаробсиз ўтказганини кўрардикку?!” дердилар. Шу пайт денгиз унинг жасадини юқорига чиқарди. Шундан сўнггина Бани Истроил унинг ўлганига ишонди.

Аллоҳ таоло Фиръавнга деди: “**Мана бугун сендан кейингиларга белги (ибрат) бўлишинг учун жасадингни кутқарумиз**” (*Юнус*, 92).

Шундай қилиб, Фиръавннинг жасади ибрат олувчилик учун эслатма бўлди. Фиръавннинг аскарлари битта қолмай гарқ бўлишди. Гарчи ортларидан Мисрни мерос қилиб қолдирган бўлсалар-да, шундай кенг юртда дафн қилинишлари учун бир қарич ҳам жой топилмади.

«**Улар қанчадан-қанча боғларни, чашмаларни, экинзорларни ва сўлим жойларни қолдириб** (гарқ бўлиб) **кетишиди. Яна** (қанчадан-қанча) **ўзлари баҳраманд бўлган неъматларни** (қолдириб кетишиди). **Мана** шундай. Биз у (неъматлар)ни бошқа қавмга мерос қилиб бердик. Бас, уларга осмон ҳам, ер ҳам (аза тутиб) “йиғлагани” йўқ ва уларга (тавба қилиш учун) муҳлат ҳам берилмади» (*Духон*, 25–29).

*Абулҳасан Надавийнинг
“Пайгамбарлар қиссани” асаридан*
ФАЙЗО
тайёrlади.





СЎРАГАН ЭДИНГИЗ...

Ўзбекистон мусулмонлари идораси раиси, муфтий **Усмонхон АЛИМОВ** жавоб беради.



Савол: Ҳурматли муфтий ҳазратлари! Сафарда ибодатга тегишли хукмлар ўзгаради, деб эшидим. Илтимос, шу хақида

маълумот берсангиз.

Жавоб: Динимизда сафар қилиш билан баъзи ибодатларга доир хукмлар ўзгаради. Тўрт ракатли фарз намозларни қаср қилинади (икки ракат ўқилади), рўза тутмасликка изн берилади, маҳси муддати уч кунга узаяди, жума, икки ҳайит намозлари ва қурбонлик сўйиш вожиб бўлмайди. Озод аёлларнинг маҳрамсиз йўлга чиқишилари ман этилади ("Аттобийя").



Савол: Киши намозда акса уриб, "Алҳамдулиллаҳ" деса, намози бузиладими? Акса уриб, ҳамд айтганга намоздаги одам жавоб берса-чи?

Жавоб: Намозда акса уриб, ичидан ҳамд айтган кишининг намози бузилмайди. Аммо сукут сақлагани яхшидир ("Хулоса"). Агар бу киши имомга эргашган бўлса, у ичидан ҳам, ташида ҳам ҳамд айтмайди ("Темиртоший"). Бундай киши намозини битиргач, ҳамд айтади.

Акса ургангага намозда туриб жавоб бериш билан эса намоз бузилади ("Муҳит").



Савол: Жамоат намозида имомга эргашувчи киши вожиб амаллардан бирортасини тарк этса, ўзи саждаи сахв қиласадими?

Жавоб: Йўқ, у ҳолда саждаи сахв қиласадими. Чунки у имомга тўла эргашиши вожиб ("Фатовойи Ҳиндия").



Савол: Имом саждаи сахвни лозим қиласадиган хатога йўл қўйса, масбуқ (имомга кеч қолиб эргашган кимса) қандай йўл тутади?

Жавоб: Бундай ҳолатда масбуқ саждаи сахвни имомга эргашиб адо этади, кейин

етиша олмаган ракатларни ўқишига туради ("Фатовойи Ҳиндия").



Савол: Шом пайти боламни кўтариб, қўшни аёллар билан кўчада гаплашиб турган эдик, маҳалламиздан бир отахон бизни: "Жину шайтонлар тўзидиган маҳал ёш бола билан кўчада нима бор сизларга?" деб койиб бердилар. Отахоннинг гаплари қанчалик тўғрилигини билмоқчи эдим.

Жавоб: Отахон жуда ҳақ гапни айтибдилар. Жонкуяр инсонлар тобора камайиб кетаётган, "менга нима" деган бепарволик кайфияти кўпчиликни чулғаб олган ҳозирги кунимизда ана шундай отахонларнинг борлиги қувонарли ҳол. Уларнинг маҳалла маънавий ҳаётидаги ўрни бекиёс.

Аввало, динимиз аёлларни кўчада мақсадиз гап сотиб ўтириш у ёқда турсин, заруратсиз кўчага чиқишдан ҳам қайтарганини айтиб ўтиш керак. Ундан кейин, шом маҳали жин ва шайтонлар изғиб юриши ҳам ҳадиси шарифларда баён қилинган. Болаларнинг инжиқ бўлиб қолиши, уйқусида босинқирашига ҳам ана шу пайт кўчада юриши сабаб бўлади. Шу боис, бу каби беҳуда одатларга барҳам бериб, ўлчовли вақтимиздан унумли фойдаланиш пайида бўлишимиз керак.



Савол: Қироати жаҳрий ўқила-диган фарз намозларини ёлғиз ўқувчи киши ҳам жаҳрий (овоз чиқариб) ўқиса бўладими?

Жавоб: Қироати жаҳрий ўқиладиган фарз намозларини ёлғиз ўқийдиган одам ихтиёрлидир, истаса, овоз чиқариб ўқишиди, истаса ичидан қироат қиласадими ("Фатовойи Ҳиндия").



Савол: Ҳозир йигитлар Россияга бориб, ярим йил-бир йил ишлаб келишяпти. Улар анча пайт оиласи билан яшамагани сабаб никоҳлари бузилмайдими?





Жавоб: Йўқ, эр хотиннинг айри яшашлари қанча давом этса ҳам, никоҳлари бузилмайди. Никоҳ эр хотиндан бири вафот этса, эр хотинини талоқ қилса ёки эр хотиндан бири куфр сўз айтса, диндан чиқса (муртад бўлса) гина бузилади.



Савол: Жума хутбасини минбарга чиқиб ўқиган имом ноибини жума намозига имомликка ўтказиши мумкинми?

Жавоб: Йўқ, мумкин эмас. Хутбани ўқиган киши жума намозига ҳам имом бўлиши керак. Фуқаҳолар айтишича, ҳатто хутба ўқиганидан кейин имомнинг таҳорати кетиб қолса ҳам, ўрнига бошқаси жума намозига имом бўлолмайди. Хатибнинг таҳорат олиб келиши кутилади (“Фатовойи Ҳиндия”).



Савол: Имом жума хутбасини ўқиётиб Пайғамбаримиз (у зотга Аллоҳинн
саломи бўлсин) исмларини зикр қилиган эди, ёнимда ўтирган киши пастроқ овозда салавот айтди. Намоз тугагач, бир киши ўша одамга хутба ўқилаётганида жим турилади, деб танбех берди. Мен ҳайрон бўлдим: Пайғамбаримиз (у зотга Аллоҳинн
саломи бўлсин) эсланган жойда салавот айтилмайдими?


Жавоб: Бошқа ҳолатларда Расуллороҳнинг (у зотга Аллоҳинн
саломи бўлсин) номи шарифлари зикр қилинганида эшигтганлар дарҳол салавот айтишлари керак. Аммо жума хутбаси ўқилаётганида салавот айтиш макруҳdir (“Татархония”). Шунингдек, бундай пайтда гапириш, тасбех айтиш, акса уриб, ҳамд айтганга жавоб бериш, саломга алик олиш ҳам макруҳ, дейилган (“Сирожул вахҳож”).



Савол: Эсналганида нима учун қўл билан оғиз беркитилади? Бунинг бир асоси борми?

Жавоб: Албатта бор. Бу ҳақда ҳатто Имом Бухорийнинг “Ал-адаб вал-муфрад” китобларида маҳсус “Эснагандა қўл билан оғизни тўсиш ҳакида” номли боб бор. Шу бобда келган ҳадислардан бирини зикр қилиб ўтамиш: Абу Саид Худрийдан (Аллоҳ
бўлсин ризо) ривоят қилинади: Расуллороҳ (у зотга Аллоҳинн
саломи бўлсин) дедилар: “Агар бирор тантангиз эснасангиз, қўлингизни оғзингизга кўйинг, чунки шайтон киради”. Эснаш келганида намоздан бошқа ҳолларда чап қўл орқаси билан оғиз тўсилади. Шунингдек, ҳадисларда эснаб туриб: “ҳоҳ” дейиш шайтоннинг яйрашига сабаб бўлиши ҳам баён этилган.

Нўймон АБДУЛМАЖИД
ёзиб олди.



ФАҲМОЛОВЧИ ҚАЛБ КЕРАК

Абдуллоҳ Пайғамбаримизнинг (у зотга Аллоҳинн
саломи бўлсин) амакилари Аббоснинг ўғли. У Расуллороҳнинг (у зотга Аллоҳинн
саломи бўлсин) сўзларини эшишиб, амалларини кўриб, улгайди. Аббос туғилганида у зот (у зотга Аллоҳинн
саломи бўлсин): “Уни динда факих қилгин”, деб дуо килдилар. Абдуллоҳ улгайгач унга: “Ҳар қандай ҳолатда Аллоҳни ёдингда тут, у ҳам сени ҳифзу ҳимоясига олади, Сенга яқин бўлади”, дер эдилар.

Расуллороҳ (у зотга Аллоҳинн
саломи бўлсин) вафот этган иили Ибн Аббос ўн уч ёшда эди. У илмни севувчи, Куръон ва суннатга оғишмай амал қилувчи эди. Оғир дамларда Пайғамбаримиз (у зотга Аллоҳинн
саломи бўлсин) билан бирга бўлди, у зот дунёдан ўтганидан кейин ҳам саҳобалардан илм ўрганди.

Саҳобаларнинг қўпи вафот этгач, Ибн Аббос етакчи факихлардан бири бўлиб қолди. Ундан: “Эй Ибн Аббос, бу илмга қандай етишдинг?” деб сўрашганида: “Сўровчи тил ва фахмловчи қалб билан”, деб жавоб килди.

Юлдуз АСҚАР қизи
тайёрлади.



ИСЛОМ ВА ОЛАМ



Киевга ташриф

Шу йил 16 сентябр куни Малайзиянинг Перлис штати амири Сайд Файзуддин Путра Украина мусулмонлари идорасига ташриф буюрди. Мехмонга Малайзиянинг мамлакатдаги фавқулодда ва муҳтор элчиси Чуа Теонг Бан ҳамроҳлик килди. Муфтий Аҳмад Тамим мамлакатда диний таълим ривожи, турли конфессиялар билан дўстона алоқалар ҳақида сўзлаб берди. Сайд Файзуддин Путра қабул учун миннатдорлик билдириди. Учрашувда Малайзия халқаро Ислом университети мударрис ва талабалари билан тажриба алмашиш масаласи муҳокама этилди.

Эксперт гурухи тузилди

Ислом молия ташкилотлари ҳамда банклари фаолиятини назорат қилувчи янги уюшма тузилди. Иброҳим Десай бошлиқ Жанубий Африка Ислом уламоларидан иборат эксперт гурухи молия ташкилотлари қонунларга қандай риоя этаётганини кузатиб боради. Олимлар кўпроқ мижозлар хуқуқини ҳимоя қилиш билан шуғулланади. Мутахассислар бундай амалиёт корхоналарда қатъий интизом ўрнатилиши самарадорлик ортишига сабаб бўлади, дейишмоқда.

Пайғамбаримиз (алайҳиссалом) ҳақларида янги фильм

Қатар киноижодкорлари Мұҳаммад пайғамбаримиз (у зотга Аллоҳининг салоти ва саломи бўлсин) ҳақларида янги, юксак даражада сифатли фильм суратга олишни режалаштиришди. Кувайт ахборот агентлиги хабар беришича, уч қисмдан иборат фильмни суратга олиш жараёнида тўрт юз эллик миллион доллар сарфланади. Фильм ноёб санъат асари бўлиши ҳамда Пайғамбаримиз (у зотга Аллоҳининг салоти ва саломи бўлсин)

ҳақида бугунга қадар ишланган фильмлардан яхши чиқиши кўзда тутилган. Иложи борича кўпроқ томошабин жалб этиш мақсадида фильм инглиз тилида олинади. Ижодкорлар барча техника ва сценарий тайёр эканини билдиришиди.

Кўргазма бўлиб ўтади

Фаластинда қадим кўлёмзмалар ва ноёб буюмлар кўргазмаси бўлади. Мамлакат саёҳат ва қадимий ёдгорликларни сақлаш вазирлиги ушбу тадбирни миллий тарих музейида ўтказади. Бу диёрда қадимда муомала-да бўлган тангалар, усмонлилар салтана-ти тамғалари на-мойиш этилади. Шунингдек, қадимий хужжатлар, Куръони



карим нусхалари ва ўймакорлик санъати дурдоналари ҳам ушбу кўргазмадан ўрин олади. Ташкилотчилардан Аҳмад Парч ёшларнинг тарихни яхши билиши ва миллий маданият ҳақида ёрқин тасаввурга эга бўлишида кўргазма жуда муҳимлигини таъкидлади.


Расмий ташриф

Миср Араб Республикас Бош вазири Хишом Қандил шу йил 19–20 сентябр кунлари Суданга расмий ташриф буюрди. У мезбон мамлакат Бош вазири билан учрашиб, Миср ва Судан ўртасидаги дўстона алоқаларни тиклаш ва ривожлантириш ҳақида музокаралар олиб борди. Шунингдек, Хартум шаҳрида Мисрнинг “Аҳлий” банки бўлнимин очиш ҳақида ҳам гаплашиб олди. Банкнинг расмий очилиш

маросимида икки мамлакат раҳбарлари иштирок этиши таъкидланди.

Ҳаж вазири баёноти

Ҳажга борувчилар ададини кўпайтиришни сўраб қирқдан ортиқ давлат Саудия Арабистони Ҳаж вазирлигига мурожаат қилди. Ҳаж вазири Бандар Ҳожар Масжидул Ҳаромда кенг кўламли таъмир ишлари олиб борилаётгани боис ушбу сўровларга рад жавоб берди. У Саудия Арабистонининг яқин беш йил мобайнида эски режа бўйича ҳожилар қабул қилишини айтди. Ҳозир атрофдаги кўпгина бинолар бузилиб, Ҳарам худудига қўшиляпти. Шу боис меҳмонхоналар етиш маслиги қийинчилик туғдириши мумкинлиги айтилди. Ўн бир миллион долларли лойиха бўйича бу ерда ҳали анча иш амалга оширилиши керак.



Ҳайдовчига мақтov ёрлиги

Бирлашган Араб Амирликларининг Дубай шахри полицияси йигирма олти ёшли покистонлик ҳайдовчи Умар Ажмалга олийжаноблиги учун мақтov ёрлиги топширди. Ҳайдовчи ишдан уйга қайтаётганида такси орка ўриндиғида чарм дипломатни кўриб қолади. Уни очиб ҳам кўрмай, шаҳар назорат идорасига топширади. Нозирлар эса унинг эгаси Саудия Арабистонидан келган ишбилармон эканини аниқлашади. Дипломатни эгасига қайтаргач, унда бир юз йигирма беш минг риёл пул ва қимматбаҳо буюмлар борлиги маълум бўлди. Саудиялик ишбилармон камтарин мусулмоннинг имон-эътиқодига қойил қолиб, унга каттагина суюнчи берди.

Энг ёш вазир

Йигирма тўққиз ёшли Ҳадяトイқ Норвегия маданият вазири этиб тайинланди. Ушбу мусулмон аёл мамлакат тарихида энг ёш вазирdir. У келгусидаги ишлари режаси ҳақида оммавий ахборот воситаларига баёнот берди. Янги вазир маданият мамлакатнинг кундалик хаёти ажралмас қисмига айланиши зарурли-

гини, Норвегияда истиқомат қилувчи ҳар бир шахснинг қайси динга эътиқод қилишидан қатъи назар, ўз санъати ва маданиятини эркин намоён этиш ҳуқуқи борлигини таъкидлади.

БМТ йигини

Миср Араб Республикаси президенти Мухаммад Мурсий Бирлашган Миллатлар Ташкилоти Бош ассамблеясининг олтмиш еттинчи йигинида иштирок этиш учун Америка Кўшма Штатларига ташриф буюрди. Анжуマンдан олдин у “CBS” телеканалига сұхбат берди. Шунингдек, ташкилот Бош директори Пан Ги Мун билан ҳам сұхбат қурди. Миср раҳбари ушбу йигин дунёда тинчликни сақлаш ва мамлакатлараро дўстона муносабатларни тиклашда муҳим омил бўлиши зарурлигини таъкидлади.

Анжуман ўтказилди

Гонгконгда Йслом олами уюшмасининг йиғилиши ўтказилди. Анжуманда ҳозир ушбу мамлакатда яшовчи Африка мамлакатлари, Бангладеш ва Индонезия каби давлатлар вакиллари иштирок этилди. Иш ахтариб ёки бошқа юмуш билан келган мусулмонлар яхши шароит яратиб берилаетгани учун ташаккур айтилди. Ҳозир оролда яшаётган икки юз эллик мингга яқин мусулмоннинг юз минг нафари четдан келганлардир. Қатнашчилар бу ерда масjidлар саноқли бўлса-да, эмин-эркин ибодат қилиш мумкинligини таъкидлашди.



Қатар сармояси Бразилияда

Қатарнинг “Barwa Bank” Йслом банки Америка Кўшма Штатлари ва Бирлашган Араб Амирликларида қарзлар бўйича иш олиб борар эди. У фаолият доирасини кенгайтириб, Бразилия бозорига ҳам кирди. Маълумотларга кўра, ҳозир Бразилия ривожланиш бўйича Хитой, Ҳиндистон ва Россия каби йирик мамлакатлар қаторига қўшилиш арафасида. Бу юртнинг араб мамлакатлари билан бир йиллик савдо-сотиғи миқдори саккиз миллиард доллардан ошди. Мутахассислар бундай мамлакатда иш олиб бориш яхши фойда беришига ишонч билдиришмоқда. Бундан ташқари,



футбол бўйича 2014 йилги жаҳон чемпионати, 2016 йилги Олимпия ўйинлари ҳам Бразилияда ўтади.

Мамлакатни тиклаши ўлида

Америка Кўшма Штатлари Афғонистоннинг Шибирғон вилоятида нефт қувурларини қазиб олиш учун бир юз йигирма миллион доллар ажратди. Американинг Афғонистондаги доимий вакили Кейт Майнц айтишича, ушбу лойиҳага ҳаммаси бўлиб беш юз миллион доллар кетади. Колган маблағни эса Осиё тараққиёт



банки беради. Кейинчалик АҚШ Балхдаги қурилиш ишлари учун яна бир юз олтмиш миллион доллар моддий ёрдам кўрсатишини маълум қилган.

Экологияли масжид

Буюк Британиядаги мусулмонлар уюшмаси қошида ташкил этилган маҳсус жамғарма Кэмбриж шаҳрида экологияли масжид барпо қилиш ҳаракатида. Ушбу жоме бошқалардан тубдан фарқ қиласди. Масалан, хонақоҳ табиий шамоллатиш ўюли билан совутилади. Унинг теварик-атрофига боғ яратишни машҳур лойиҳачи Эмма Кларк зиммасига олган. Шунингдек, масжид томи ҳам бўш қолмай, қушлар ин қуришлари учун маҳсус ўт-ўлан ўстирилади. Кэмбрижда ҳозир турли мамлакатлардан келган минглаб мусулмон талабалар яшайди. Уюшма уларга шароит яратиш билан бирга атроф-муҳит тозалигига ҳам ҳисса қўшмоқда.



Диндорларга ёрдам

Туркия Фавқулодда вазиятлар вазирлиги, Диёнат ишлари вазирлиги, хайрия жамғармалари ва “Қизил яримой” жамиятлари биргаликда олтмиш миллион доллардан кўпроқ маблаг йигишиди. Бу пуллар Бирманинг Аракан вилояти мусулмонларига бегараз ёрдам сифатида юборилди. Шу йил

ёзда Мянма мусулмонлари бошига тушган кулфатдан камида юз минг мусулмон зарар кўрган. Бундай ёрдам уларга моддий ва маънавий жиҳатдан далда бўлиши турган гап.

Янги музей очилди

Қуддус шаҳри мусулмонлар, насронийлар ва яхудийлар учун ҳам ўзига хос тарихий ва муқаддас жой саналади. Мана шу гўзал маконда Аманда Вейс «Bible Lands Museum» музейини ташкил қилди. Аманда ушбу музейга турли тарихга эга, лекин уч динга ҳам оид нодир кўлёзмалар, ноёб буюмлар ва қадимий санъат намуналарини йиғди. Бу ерга ҳар куни турли дин вакиллари келиб, бир-бирлари билан фикр алмашияпти. Музей асосчили турли дин вакилларини бир жойда жамқилиш ва улар ўртасида яхши алоқаларни мустаҳкамлаш учун ажойиб макон пайдо бўлганини таъкидламоқда.

Англия ва ИХТ

Ислом ҳамкорлик ташкилоти ва Буюк Британия ўртасида алоқаларни ривожлантириш бўйича шартнома имзоланди. Бирлашган Қиролликнинг Ташқи ишлар баронессаси Саида Варсий ва ИХТ Бош котиби Акмалуддин Эҳсонўғли ўртасида имзоланган битимда хавфсизлик, маданият, фан, таълим, инсон ҳуқуқларини ҳимоя қилиш ва динлараро мулоқот каби соҳалар қамраб олинди.

Дубай академияси

Испаниянинг “Реал Мадрид” футбол клуби Дубай шаҳрида футбол академиясини ташкил қилиш режасини тузяпти. Академияда етти ёшдан ўн тўрт ёшгача бўлган ўспириналрга юқори малакали мутахассислар футбол сирларини ўргатишиади. Назарий машқлар Абу Зобининг Брайтон коллежида ўтказилади. Клуб учун Рас Хайма туманида 2015 йили битказилиши мўлжалланган дам олиш маскани ҳам шу лойиҳага киритилган. Мажмууни барпо қилиш учун бир миллиард доллар сарфланиши кўзда тутилган.



РИЁДАН САКЛАНАЙЛИК

“Остидан анхорлар оқиб турувчи, хурмою узумла-ри бор, турли хил мевалари мүл боғи бўлган бир одам ўзи кексайиб, нотавон (ёш) болалари билан қолган пайтида ўша боғини оловли тўфон уриб, ёниб кетишини хоҳлайдими? Тафаккур қилурсизлар, деб Аллоҳ ўз оятларини сизларга шундай баён қиласди” (Бақара, 265).



Бу мисол савобли ишларни эл кўзи учун қиласди кишиларга танбеҳдир. Аллоҳ таоло ёнгина туфайли боғбон не умидлар билан ўстирган боғидан айрилганидек, риёкор одам ҳам охиратда ажру савобдан баҳрасиз қолади.

Ибн Лубайдан (Аллоҳ ундан роғи бўлсин) ривоят қилинади. Расулуллоҳ: (У зотга Аллоҳининг саломи ва саломи бўлсин) “Сизлардаги энг хавфсирайдиган нарсам махфий ширкдир”, дедилар. Шунда саҳобалар: “Эй Аллоҳнинг Расули, махфий ширк нима?” деб сўрашди. У зот: “Бу риёдир”, деб жавоб бердилар.

Демак, риё Исломда катта гуноҳларнинг ҳам энг ёмони – ширкка далолат қиласкан. Ундан ҳар бир мўмин-мусулмон ҳушёр бўлиши керак. Риё қални корайтирувчи иллат саналади. Риё қилувчиди холис ният ва ихлос бўлмайди. Агар мўминнинг ибодатига заррача риё аралашса, бу ибодатдан фойда йўқ. Киши риё билан намоз ўқиса, рўза тутса, ҳажга борса факат машаққат чеккани ва Аллоҳ таолога осий бўлгани қолади.

Ижтимоий ҳаётимизда ҳам риё бизга кўп зарар келтиради. Дейлик, бирор яқинимиз оламдан ўтса, уларнинг ҳақларига яхши дуолар қилиш билан бирга орқаларидан савоб борар деган ниятда эл-юртни чакириб дастурхон ёзамиз, эҳсон қиласиз. Аммо бу ҳайру эҳсонимизга риё аралашиб қолмаслигига ҳеч ким

кафолат беролмайди. Аслида, савоб факат дастурхону ошлардан бормайди-ку, риёдан узоқ бўлган яна бошқачароқ яхшиликлар ҳам қилсан, айни муддао эмасми? Тўйхоналарда минг-минглаб кишиларга дабдабали дастурхон ёзиш ўрнига “Мехрибонлик”, “Муруват” уйларига, ёлгиз қарияларга, етимхоналарга, ноҷор оиласларга, илм масканларига холис ёрдам кўрсатилса, савобига нима етсин? Тўйларимиз ҳам худди шундай. Ҳукуматимиз тўйларни ихчамлаштириш бора-сида қарор ва дастурлар ишлаб чиққанига қарамай, баъзилар кимўзарга дабдабани кучайтириб бормокда. Ўша тўйга кетган ортиқча сарф-харажатни икки ёшнинг келажаги учун тадбир билан ишлатилса бу ҳам савоб.

Аллоҳ таоло бундай марҳамат қиласди: «**Эй имон келтирганлар! Молини одамлар кўрсинг деб берадиган, Аллоҳга ва охират кунига ишонмайдиган кимсага ўхшаб, (берган) садақаларингизни миннат ва озор билан йўққа чиқарманг!** У (риёкор) устини тупроқ қоплаган силлиқ қояга ўхшайди, устига жала ёққанда, (тупроқ ювилиб,) сип-силлиқ тошнинг ўзини қолдиради. Улар топган (ва сарфлаган) бойликларидан ҳеч нарсага эга бўла олмайдилар...» (Бақара, 264).

Одамларнинг мақтовини истаб ёки хўжакўрсинг учун қилинган амаллар эвазига Аллоҳ таоло бу дунёда банданинг мақсадини хосил қиласди. Аммо, охиратда савоб ато этмайди. Бу ҳақда Пайғамбаримиз (у зотга Аллоҳининг саломи ва саломи бўлсин) шундай марҳамат қиласдилар: “Ким бу дунёда бирор амални одамлар эшитсин, деб қиласа, Аллоҳ уни одамларга эшиттириб қўяди. Ва ким одамлар кўрсинг деб қиласа, Аллоҳ уни одамларга кўрсатиб қўяди” (*Насоий ривояти*). Демак, бу дунёning обрўсини истаб қилинган амалга факат бу дунёning ўзидагина мукофот берилади, охиратда эса насиба бўлмайди. Айниқса, эвазига савоб умид қилинадиган, динимизда ибодат ва амали солиҳлар қаторида саналган ишларга риё аралаштиришдан эҳтиёт бўлиш керак. Аллоҳ таоло: «..**Бас, шундай намозхонлар ҳолига войки, улар намозларини “унутиб” қўядилар, риёкорлик қиласдилар...**» (*Моъун, 4-6*) дея огоҳлантирган.

Айтиб ўтилганидек, риё ширкнинг бир кўринишидир, ширк эса қош билан қовоқнинг орасида турадиган, кўпчилик одамлар фарқлаб ололмай қоладиган оғатдир. Унинг оқибатида эса барча қилинган тоат-ибодат ва яхши амалларнинг савоби йўқ бўлиб кетади.

Мўмин одам ҳар бир амалини холис Аллоҳ таоло учун бажармоғи лозим. Одамларнинг мақтовини истаган киши эса икки дунё саодатидан ажраб қолиши мумкин.

Аллоҳ таоло барчаларимизни гуноҳи кабиравлардан сакланиб, солиҳ амаллар қилиб яшашга муваффақ қиласин.

Абдуқаҳҳор ЮНУСОВ,
Тошкент шаҳар
“Собитхон ҳожи”
жоме масжиди имом-хатиби



Алоуддин КОСОНИЙ

АЁЛЛАРГА ХОС ҲУКМЛАР

“БАДОЕУС САНОЕ... ”ДАН


А ёл бачадонидан келадиган одатий суюқлик ҳайз, аёл қўзи ёригач келгани эса, нифос деб аталади. Ҳайз қорамтири ёки тўқ қизил рангда бўлиши мумкин. Тўққиз ёшдан олдин ва ҳайз тўхтайдиган ёшга етгач, келгани ҳайз эмас, бир касаллик сабабли бўлиб, истиҳоза дейилади. Истиҳоза келса, ювиб, таҳорат қилиб, намозини ўқийверади, рамазон ойида бўлса, рўзасини ту-таверади. Ҳайзли аёлга то ҳайз муддати тугаб, тукқан аёлга эса нифоси тугаб покланмагунича намоз ўқиши дуруст эмас. Ҳайзли ёки нифосли аёл рўза тутмаслиги ва эри билан қўшилмаслиги керак. Гусл қилиб покланга-нидан кейин унга намоз, рўза ва жинсий муомала ҳалол бўлади.

Мазҳабимиз уламолари наздида ҳайз ранги қорамтири ёки кўкимтири бўлса ҳам, суюқлик бачадондан келдими, аёл ҳайз кўрган ҳисобланади. Ҳайз муддатининг энг ками уч, энг кўпи ўн кеча-кундуздир. Жаноби Расулуллоҳ ((зотга Алоҳининг
салоти ва саломи
бўлсин)) сўзлари ва мазҳабимиз уламоларининг далиллари асосида мана шу муддат белгиланган. Қиз болада биринчи марта ҳайз келса, илк ҳайз муддат ўн кун деб, беш-олти кундан кейин тўхтаса ҳам, ўн кунгача ҳайз келиб қолиши мумкин, деб кутилади. Ўн кундан кейин ҳам келса, ҳайз эмас, истиҳоза ҳисоб қилинади. Икки-уч марта бир хил саноқда келадиган бўлса, айтайлик, беш кунда тўхтаса, унинг одати беш кун экан ёки уч кунда тўхтаса, одати уч кун экан, деб белгилаб олиб, шу муддатдан кейин қон тўхташи билан гусл қилиб, ўн кунни кутмасдан ибодат қиласверади. Аммо беш кунлик одати бўлса-ю, шу муддат тўлганидан кейин ҳам ҳайз тўхтамаса, беш кун ўтганидан кейин ҳам ўн кунгача яна ҳайз деб, одатидан ташқари кунларда ҳам ибодат қилмай туради. Энди қон тўхтамай, ўн биринчи кунга ўтса, демак, беш кундан кейингиси касаллик, деб шу беш кундан кейинги қолдирган намозларини қайта ўқийди. Ам-

мо, ҳайз кўриш одатини беш кун бўлиб, агар етти, саккиз кунда тўхтайдими, тўққиз ё ўн кунда тўхтайдими, ҳаммаси ҳайз ҳисобланади. Менинг одатим беш кун эди, колган беш куни – бу касаллик қони, дейилмайди. Аммо қон оқиши ўн бир кунга ҳам ўтиб кетаверадиган бўлса, демак, одатдагидан ташқариси касаллик қони экани аниқ бўлиб, тўрт ёки беш кунги одатидан бу ёғида қолдирган намозларини қайта ўқийди.

Икки ҳайз ўртаси тухр, яъни поклик вақти – камида ўн беш кун, кўпига чегара йўқ. Одатда, бирор ҳар ўн беш кунда, бирор икки ой-





да ҳайз кўриши мумкин ва шу унинг одатига айланниб қолади. Одатга айланмас экан, ё одатга айланганидан сўнг ҳам бир аёл тоза бўлганидан кейин ҳали ўн беш кун бўлмай, яна қон келса, бу ҳайз эмас, балки касаллик қони ҳисобланади. Бу ҳолда у таҳоратини олиб, намозини ўқийверади. Демак, ҳайзнинг ками уч кун, кўпи ўн кун, икки ҳайз оралиқ муддатининг ками ўн беш кун.

Нифоснинг энг камига чегара йўқ. Чунки бола туғилгач, нифос, эҳтимол, бир соатда тўхтар, қанчада тўхтаса ҳам, аёл нифосдан покланган бўлади ва ғусл қилиб, ибодатида давом этади, пок хотинга нима лозим бўлса, у аёлга ҳам шу лозим бўлади. Нифоснинг энг кўпи қирқ кундир. Шу боис ҳалқ орасида бу муддатни “чилла” дейиш урфга айланган. Масалан, уч фарзанд кўриб, учовида ҳам қирқ кун бўлмасдан, ўн кунда тўхтайдими, ўн беш кундами ва шу уч марта ҳам бир хил муддат такрор бўлса, демак, у аёлнинг нифоси шу миқдорда экани белгиланиб, ўшандан кейин ювиниб намозини бошлайверади. Аммо уч марта туғмагунича у қирқ кунгача нифос келишини кутади. Ўртада бир кун-ярим кун келмай қолса ҳам, у нифосда турган ҳисобланади. Демак, уч бола кўргунича ҳам бир хил одат жорий бўлмаса, тўртинчи фарзанд кўрганида яна қирқ кунни кутади ё учтада бир хиллик кузатилиб, одати жорий бўлса, шу одатидан кейин қон, мисол учун, беш кунда ёки ўн беш кунда тўхтаб қолса, демак, тозаман, деб гусл қилиб, ибодатини қиласеради.

Агар эгизак фарзанд кўрса, нифос қачондан бошланади? Имом Абу Ҳанифа ва Абу Юсуф наздида, нифос биринчи фарзанд туғилишидан бошланади. Баъзан икки эгизак ўртасида туғилиш оралиғи соатлаб ёки кунлаб давом этиши мумкин. Ана шунда қирқ кунлик нифос вақти биринчи боладан ҳисобланади. Имом Мухаммад эса, эгиз тукқан аёлнинг нифоси иккинчи боладан бошланади, дейди. Биринчи боладан деган ҳукмга фатво берилган. Ҳайз ва нифос кўрганида намоз ўқиш, рўза тутиш, Куръонни ушлаш, ўқиш, масжидга кириш ва Байтуллоҳни тавоғ қилиш дуруст эмас. Шу айтилган икки ҳолатдан бошқа вақтда аёл кишидан келган қон истихоза бўлиб, у касаллик ҳисобланади. У намоздан ҳам, рўздан ҳам тўсмайди. Агар у давомли келиб турадиган бўлса, ҳар намоз вақтига алоҳида таҳорат олиб, намозини ўқийверади.

Муаллимлик шарафли ва улуғ касбдир. Абу Амомадан (Аллоҳ ундан рози бўлсин) ривоят қилинган ҳадисда Расулуллоҳ (У зотга Аллоҳ унни саломи бўлсин) бундай деганлар: “Аллоҳ таоло, фаришталар, осмонлар ва ер ахли, ҳатто уясидаги чумолилару денгиздаги балиқлар ҳам инсонлар муаллимига яхшилик сўраб дуо қиласди”.

УСТОЗЛАРИМИЗ БАЙРАМИ



Халқимиз муаллимларни қадрлаб: “Устоз отангдай улуғ” дейди. Юртимизда устозлар алоҳида эъзозланади. 1 октябр куни “Ўқитувчи ва мураббийлар куни” деб эълон қилинган. Ҳар йилгидек бу байрам барча ўкув масканларида кенг нишонланди.

Иккинчи октябр куни Имом Бухорийномидаги Тошкент Ислом институтида ҳам ана шу улуғ байрамга бағишлиланган тадбир бўлиб ўтди. Унда фахрий устозлар ҳам қатнашдилар.

Байрам тантанасида институт талаabalari Куръон тиловат қилишди, сахна кўринишлари билан ва салавотлар айтиб чиқишиди. Шунингдек, талабалар меҳмонлар билан қизиқарли савол-жавоблар ўтказишиди, ғолибларга совғалар улашишиди. Тадбир давомида Диний қўмита таълим бўлими бошлиги Шоҳруҳ Абдурасулов, Ўзбекистон мусулмонлар идораси раиси ўринбосари шайх Абдулазиз Мансур, кадрлар тайёрлаш бўлими мудири Жалоллиддин Нуриддинов ҳамда Тошкент Ислом институти ректори Ҳайдархон Йўлдошхўжаевлар биринчи босқич талабаларига талабалик гувоҳномаларини топширишиди.

Нилуфар ОРТИҚҲЎЖАЕВА,
ТИИ 2-курс талабаси



Ғулом ФАТҲИДДИН

Сен берган туйгуга, ҳисга асирман...

МУҲАББАТ ЗАНЖИРИ

Ўзингдан бошладим, бари Ўзингдан,
Сенинг каломингдан, Сенинг сўзингдан.

Бу ёруғ дунёга йўлладинг, Аллоҳ,
АЗобда синадинг, қўлладинг, Аллоҳ.

Қалбан иқрор бўлиб, қилурман сажда,
Каломинг, ояting – бизларга мужда.

Мен Сенинг олдингда хасман, басирман,
Сен берган туйгуга, ҳисга асирман.

Тобеман Сен берган юракка, жонга,
Умр деган онга, ақлу имонга.

Бокиб бу замонга, давру давронга
Хиёнат этдимми аҳду паймонга?

Бўлсам-да ишқингга сомеъ, занжирбанд,
Дунёга меҳримни қўйдимми баланд?

Боқмасдан маъшуқа ҳиндуда холига,
Ҳирс қўйдимми, ё Раб, дунё молига?

Йўқ, ахир, Ўзингга бандаман, қулман,
Занжирларинг сирли, ғулларинг гулдан.

Юрак томирларим, ақлу ардоғим –
Кулчилик бобида қисмат арқонинг.

Берган муҳаббатинг, ҳар лаҳза, онинг –
Юрагим боғланган нурли арқонинг.

Башар дараҳтида оддий меваман,
Сен берган Ватани – юртни севаман.

Сен шошмай, тобора чирмаб, боғлайсан,
Ёмғир сувларида ювиб, доғлайсан.

Боқмангиз лаб буриб ифтихоримга,
Ўзимни топширсан ихтиёрига.

Кўринг, мен ошиқни, қулни, занжини,
Бўйнимда муҳаббат ранжи, занжири.

Шу ишқиз одаммас – тупроқман, кулман,
Шу ишқ тарқ айласа, йўқман, бир пулман.



Шукр, мен ошиқман, вайронам – гулшан,
Лайлимсан, Мажнуунман, Сен – Шоҳ, мен – қулман.

Шу буюк ишқимни адо этмагин,
Севгим занжиридан жудо этмагин.

Ишқи йўқ қаслардан асра, бер паноҳ,
Жамолинг нурини ёр айла, Аллоҳ!

Омин! Охиратда Ўзинг хор этма,
Имон бер, юзингга бизни зор этма.

ЭЙ ДЎСТ

Раво кўрдинг ўзингга меҳру вафони, эй дўст,
Бизга эса беадад жавру жафони, эй дўст.

Роҳату фарогатда ўтар умринг хотиржам,
Оқибати ёмондир қайфу сафонинг, эй дўст.

Ташла назар улусга, дилларга бўлғин ҳамдард,
Олгил, ғарип етимдан хайру дуони, эй дўст.

Кўрсам эдим сенда мен арзу самода тенгсиз
Шашти баланд, жаҳди зўр марди Худони, эй дўст.

Кимки дилда ёри бор, бўлғай ғолиб, баҳтиёр,
Шуқру тавба тахтидир, бил, бу нидони, эй дўст.

Келур бир кун сўроқлаб: “Тўрт оёкли чўбин от”,
Кетар чогинг унутма, ўйла видони, эй дўст.

Бу қўналға дунёда ўтди не-не инсонлар,
Душман билиб ўзига кибру ҳавони, эй дўст.

Кўз-кўзладинг зарингни, менга гардча қадри йўқ,
Тинглаб ушбу навони, англа Аллоҳни, эй дўст.

ИЛТИЖО

Кўнгил, учгил фалакларга, салом айтгил малакларга,
Малойиклар билан сирлаш, назар солма бўлакларга.

Хузурига етиб боргач, арзим айтгил ўшал ёрга,
– Бир боқсанг, на бўлгай? – де, ишқ йўлида ҳалакларга.

Қолиб кетма у ёқларда, жавоб келтир жафокордан,
Кутиб мужда, умид тушгай ҳазон янглиғ йўлакларга.



Сўнгакларда ғалат оғриқ, билакларда мажол йўқдир,
Қараб қўйса, гуноҳ бўлмас фақат дийдор керакларга.

Руҳи равон – пароканда, дўзах ўти ёнар танда,
Замин отлиғ бу ватанда паноҳ борму юракларга?

Кўнгил, учгил фалакларга, салом айтгил малакларга,
Ижобат навбати етгай қачон бизнинг тилакларга?!

Кўнгилнинг ихтиёрини – бериб ёр ихтиёрига,
Гулом-о, тўй жамолига бокиб гулу чечакларга.

Кўнгил, учгил фалакларга...

Ришитон

Абдуғани СУЛАЙМОН

БОЛАЛИК

Баъзан тушларимга кирап болалик,
Завққа тўлган шодон дамлари билан.
Қайга кетиб қолди у масъум шодлик,
Бугун ҳаёт қийнар ғамлари билан.

Болаликнинг шаффоф кўчаларида
Қолдириб келибман тоза юракни.
Майсаларнинг яшил қўлчаларида
Қуёш тутқазади ўша эртакни.

Ўшанда қушларнинг тилин билардим,
Қучоғига мудом чорларди осмон.
Тонг бўйнига тинмай орзу илардим,
Мендан олис эди қайгу ва армон.

Менга азиз эди, жуда қадрли,
Райхон ҳиди келган онам кучоги.
Борлиқ туюларди завқли ва сирли,
Осмондай кенг эди отамнинг боғи.

Жуда ҳам чарчадим, жуда толиқдим
Дил уфқида офтоб чўкаётган дам.
Қўлларимдан ушлаб, болалик пайтим,
Мени олиб кетгин қайга бўлса ҳам.

СУВ

Эй дўст, дарё каби умримиз ўтар,
Зотан, руҳимизда дарё нафаси.
Билмаймиз соҳилда бизни не кутар,
Юракка тор келиб кўкрак нафаси.

Аслида бир томчи сувдан жисмимиз,
Шунданми бир сўздан кетамиз эриб.

Ҳаёт суви ичра бедор исмимиз –
Нилуфар – ғамларни юради териб.

Баъзан кўзёшимиз бўлиб шашқатор,
Кимнидир кузатиб сўнгги манзилга.
Қисмат ёмғирига бериб ихтиёр
Бир томчи сув бўлиб қайтамиз дилга.

Лойимиз қорилган илоҳий сув,
Билмаймиз олинган қайси дарёдан.
Бир кун руҳимизда кўтариб гулув –
Сувлар ювиб кетар бизни дунёдан.

Эй дўст, ийғламагин ҳуда-бехуда,
Гарчи бошга тегар ҳаёт тошлари.
Шодликни севади тириклик жуда,
Кўзга ярашади севинч ёшлари.

ТУПРОҚ

Эй дўст, сезганмисан жуда ёруғдир
Камтарликнинг тоза, маъсум йўллари.
Ҳали-ҳамон ҳеч ким етолмаган сир –
Руҳимизни кучган тупроқ кўллари.

Бу замин мендирман, бу замин сенсан,
Ундан бунёддирмиз ва унда барбод.
Ўйлаб бир хикматга беролдингми тан:
“Тупроқ остидадир бизнинг қўшқанот”.

Нечук биз бунчалар ер ишқига банд,
Бир лаҳза биз ундан узмаймиз қадам.
Ё унинг руҳига жонимиз пайванд,
Унга қовуштираси бизни ўлим ҳам.

Гарчи ҳаёлимиз ҳануз фалакда,
Вужудимиз аро замин титроғи.
Уйғонади бир ишқ маҳзун юракда –
Гўёки узилган гулнинг япроги.

Бу замин аждоддан меросдир билсанг,
Шоҳ-гадога асли тенг бу йўл, эй дўст.
Руҳингни самода кўрмоқчи бўлсанг,
Тупроқ бўлмай туриб, тупроқ бўл, эй дўст.



ОДАМЛАРГА ФОЙДАМИЗ ТЕГСИН



Маҳалла деганимизда, энг олдин қўни-кўшнилар тушунилади. Қўшниларга яхшилик қилиш ўзаро алоқаларни янада мустаҳкамлашга, тинчликни таъминлашга сабаб бўлади. Аллоҳ таоло марҳамат қилади: “**Ота-оналарга яхшилик қилинглар! Шунингдек, қариндошларга, етимларга, мискинларга, қариндош қўшнию бегона қўшнига ёнингиздаги ҳамроҳингизга, йўловчи (мусоғир)га ва қўл остингиздаги (қарам)ларга ҳам (яхшилик қилинглар)!..**” (*Niso, 36*). Ояти каримада қўшнилар икки тоифага бўлиб зикр қилинган: қариндош ва қариндош бўлмаган қўшнилар.

Мўмин киши дини, миллати ва насабидан қатъи назар, ҳаммага бирдай яхши муомалада бўлиши керак. Ҳадиси шарифда: “Ким Аллоҳ таолога ва охират кунига имон келтирган бўлса, қўшнисига озор бермасин” (*Муттрафақун алайҳ*), дейилган.

Ёши улуғ отахону онахонлар маҳалланинг файзидир. Уларни ҳурмат қилиш, зиёратига бориш, холидан хабар олиш ва насиҳату дуоларидан баҳраманд бўлиш ҳам дини-

миз кўрсатмаларидан, гўзал инсоний сифатлардандир. Абу Мусо Ашъарийдан (Аллоҳ ундан рози бўлсан) ривоят қилинади: “Кекса мусулмон кишини ҳурмат қилиш Аллоҳ таолони улуғлаш демакдир” (*Абу Довуд*). Яна бир ривоятда келишича, Расулуллоҳ (У зотга Аллоҳнинг салоти ва саломи бўлсан): “Кичикларимизга шафқат қилмаган ва катталаримизнинг шараф ва ҳақларини билмаган киши биздан эмасдир”, деганлар (*Абу Довуд, Термизий*).

Ўтган азизларимиз суннатга ва ҳадиси шарифга ихлос билан амал

қилишган. Имоми Аъзам (Аллоҳнинг раҳмати бўлсан) ўта парҳезкор ва тақвodor бўлиши билан бирга хато қилувчиларга нисбатан бағрикенг зот эди. Бир қўшниси кечалари маст-аласт бўлиб, бор овози билан бақирад: “Зое қилдилар, қандай йигитни зое қилдилар”, деб ўзича қўшиқ айтиб чиқар эди. Унинг овози Абу Ханифанинг оромини бузарди. Бир кеча ўша қўшнисининг овози чиқмай қолди. Тонг отгаҳ, Абу Ханифа уни суриштириб, мастлиги боис қамалганини билди. Волийнинг олдига бориб, уни қамоқдан озод қилди. Бирга қайтиб келишаркан, Абу Ханифа (Аллоҳнинг раҳмати бўлсан) унга: “Эй йигит, сени зое қилдикми?” деди. “Йўқ, аксинча, мени қутқардингиз. Аллоҳ ажр берсинг!” деди у ва ўша кундан бошлаб ичкилихўрликни ташлади.

Инсоннинг яхши ва ёмон кунида маҳалла аскатади. Халқимизда: “Узоқдаги қариндошдан яқиндаги қўшни яхши”, деган нақл бор. Шунинг учун маҳалладаги барча йиғинларда иштирок этиш, маърака ва маросимларда қатнашиш, беморларнинг ҳолини сўраш, муҳтоҷлардан хабар олиб туриш каби ишлар кишининг фазилатини оширади.



Улуғлардан бирининг олдига бир киши келиб: “Фалон шахардаги фалончи киши улуғ одам экан. Сув устида юрар эмиш”, деди. “Сув устида юрадиган одамга ажабланманг. Чунки ўрдак ҳам, балиқ ҳам сувда суза олади”, деб жавоб берди доно киши. Бошқа бир одам келиб: “Фалон шахардаги фалончи одам ҳавода учар эмиш”, деди. У зот: “Ҳавода учиш ажабланарли эмас, чунки қуш ҳам ҳавода уча олади”, деб жавоб берди. Шунда одамлар хайрон бўлишиб: “Сувда юриш ва ҳавода учиш каби кароматли ишлар аҳамиятсиз бўлса, инсон қачон ва қандай қилиб камолотга эришади?” деб сўраши. У зот: “Зоҳирингда ҳалқ (одамлар) билан бирга бўлишинг, ботинингда Ҳақ (Аллоҳ) билан бирга бўлишинг, уларга ёрдам беришинг ҳақиқий камолотдир”, деб жавоб берди.

Икки одам бир вақтда уйига чақирса, уйи яқинроғиникига бориш, эҳсон ва ҳадяларни ҳам уйи яқинлардан бошлаш ҳақидаги ҳадислар ҳам маҳалла аҳллари ўртасидаги муносабатга тегишлидир.

Покликда барака бўлади. Кўча-кўйни ва ҳовлиларни тоза тутиш маҳалланинг ободлигига ҳисса бўлиб қўшилади. Обод юртда пок одамлар яшайди, деб бежиз айтилмаган. Расууллоҳнинг (у зотга Аллоҳнинг
саломи бўлсанни): “Ҳеч яхши амал қилмаган бир одам йўлдан тиканли шоҳни олиб ташлагани учун Аллоҳ таоло унинг гуноҳларини кечириб юборди”, деганлари ривоят қилинади (*Абу Довуд*). Абу Зарр (Аллоҳ
уздан роғи
бўлсанни): “Ё Расууллоҳ, менга фойдали бўлган бирор амални ўргатинг”, деганида, Расууллоҳ (у зотга Аллоҳнинг
саломи бўлсанни): “Мусулмонларнинг йўлларидан уларга озор берувчи нарсаларни олиб ташла”, деб буюрганлар (*Имом Муслим ривояти*).

Динимиз бизларни ҳамжиҳатликка, покликка, озодаликка буюрар экан, бу амр замира юксак маданият билан бир қаторда инсон саломатлигини сақлаш мақсади ҳам ётади. Шундай экан, барчамиз маҳаллаларимиз ободлиги ва тозалиги йўлида яхши ишларни кўп қилишга интилайлик.

Муҳаммадкарим ИБОЕВ,
Андижондаги
“Сайид Муҳиддин маҳдум”
*Ислом ўрта-маҳсус
билим юрти мударриси*



МОМОЛАРИМИЗ АЙТАДИ...

Эр хотиннинг тахти – занжирида бўлади.

* * *

Эр – авра, хотин – астар.

* * *

Бойликка етса ёмон,
Ўзин санар ҳоқон.

* * *

Ҳалқумингни дема, ҳалкингни де.

* * *

Эрликда хўрлик йўқ.

* * *

Оила – кўш устунли айвон.

* * *

Хотин қизганса, уй тузалар,
Эркак қизганса, уй бузилар.

* * *

Ёғлиқ нарсани кумурска босади.

* * *

Қозонга яраша – қопқоги.

* * *

Эгри битган тўғри ўсмас.

* * *

Ўтин айирган болта майдонда қолади.

* * *

Сув пешонага чиққач,
пушаймондан фойда йўқ.

* * *

Эҳтиётинг бўлса, эҳтиёжинг бўлмас.

* * *

Илигинг қуриса ҳам, илдам юр.

* * *

Ямасанг – янги бўлади,
Янгининг тенги бўлади.

* * *

Баҳор яхши келса, қари терак ҳам куртак отади.

* * *

Ёмон гап – юзга тарсак.

* * *

Яхши тўн – тўй савлати,
Яхши хотин – уй давлати.

Тошкентлик Раҳима онадан ёзиб олинди.

ИҚЛИМ ЎЗГАРИШЛАРИ

Сизга маълум, ер юзида ҳарорат муттасил исиб бориши кузатилмоқда. Олимлар ушбу жараён XX асрнинг иккинчи ярмида бошланганини таъкидлашияти. Тадқиқотларга кўра, ер куррасида ҳарорат ўтган арслагидан 0,7 даражага ошган. XXI аср ўрталариға бориб бундай исии 1,1дан 6,4 даражагача ортиши таҳмин қилинмоқда. Ялпи исии океанларнинг кенгайиши, ёғингарчилик кўпайиши ва атмосферанинг ўзгаришига сабаб бўляпти. Глобал иқлим исишига музликлар эришининг ҳам катта таъсири бор. Антарктиданинг жануби-гарбидаги яриморолда иқшим 2,5 даражага қўтарилиган. 2002 йили майдони уч минг икки юз эллик километрлик, қалинлиги эса икки юз метрдан ошиқ “Ларсон” музлиги ўттиз беш кун ичидаги икки юз эллик километрга кичрайган.

Бу ҳол ҳароратнинг олдинига нисбатан деярли бир ярим баробар ортганини англатади. Шу йил бошида Россиянинг Омск, Томск ва Тюмен вилоятларининг йигирма етти минг аҳоли истиқомат киласидаги худудларида ёқсан сарик ва пушти рангли кор ҳаммани ҳайратга соглани сир эмас.

Иқлим ўзгаришларини кузатувчи канадалик бир гурӯҳ олимлар ва ҳарбий мутахассислар глобал исишига сабаб бўлаётган воқелик тўғрисида янги маълумотлар тўплашган. Экспедиция аъзолари “Уард Хант” оролидаги музликларнинг интенсив эриш ҳажми кундан-кунга кенгайиб бо-

раётганини кузатишган ва «абадий» музликларнинг 16 километрга кичрайганинг гувоҳи бўлишган. «Мен бундай ўзгаришни кўришни кутмаган эдим», – дейди Трент университети профессори Дерек Мюллэр. – Бу шуну кўрсатадики, муз майдонлари шиддат билан қисқариб бормоқда. Ҳозир бир неча улкан муз тоғлари бирбирини ушлаб турибди, аммо улар баҳайбат айсбергларга айланиши мумкин». Агар улкан муз майдонлари шу яхлит бўлакларга бўлинниб кетиб, айсберг шаклидаги оролларни ҳосил қилса, бу денгиз мухитига жуда катта салбий таъсири кўрсатади. Экспертлар-

нинг таъкидлашича, музликларнинг эришига нафакат глобал исиш, балки, мамлакатларнинг Арктика табиий ресурсларидан беаёв фойдаланиши ҳам бунинг боисидир.

Париж шаҳрида шу йилнинг август ойида ўтказилган анжуманда мутахассислар 2100 йилга бориб, ер шарида ҳарорат тўрт даражага ортиши ва натижада икки юз миллиондан ортиқ одам кўчманчи аҳолига айланиши эҳтимоли хақида огоҳлантиришди.

Оврупалик олимлар ёзда ҳаво мунтазам ўн беш даража совуқ бўладиган Гренландия иқлимини ўрганишти. Улар бу диёрдаги кўкаламзор табиат остида ҳам икки ярим километрлик муз қатлами борлигини аниқлашди. Ушбу музликлар пайдо бўлганига бир неча минг йилдан ошган бўлиб, оддий айсберглар каби уларнинг асоси тош ёки қоядан иборат эмас. Экспедиция аъзоси профессор Гуттер Шек Берг бундай дейди: “Музнинг ўрта қатлами сувдан иборат, шу босис у харакатланувчан. Баҳайбат музлик остида сув кўпайиб, кўл ҳосил қилиши иқлим исиб бораётганидан далолат беради”.

Машҳур алпинист Саймон Йейтс иқлим ўзгариши бўйича





мулоҳазаларини қўйидагича баён қиласди: “Мен ўспиринлик чоғимдан бери тоғ чўққиларига кўп чиқаман. Йигирма беш йил ичидаги дунёнинг бир неча мамлакатидаги қояларда бўлдим, баъзиларига икки мартадан бордим. Ўтган йили бундан ўн уч йил олдин борганим Тян-Шон тоғларидаги шимолий “Инилчиқ” музлигига яна бориш насиб қилди. У ерда авваллари факат қор ёғар эди, ҳозир эса ёмғирни кўриб, ҳайрон қолдим. 2007 йили Покистондаги баландлиги бўйича жаҳонда иккинчи ўринда турадиган “Балторо” тепалигига чиқдим. У ернинг иқлими ҳам ўн беш йил олдингисидан буткул ўзгариб, қор қатлами сезиларли даражада пасайганини кўрдим”.

Гаваянинг жамоатчилик аъзоси вакиласи Триша Кехаула ни Уотсон глобал исиш жараёни ҳакида шундай фикр билдириди: “Гаваядаги дарё ёш болалар чўмилса бўладиган даражада тоза ва саёз эди. Ҳозир сув мўллигидан кирғоқларни бетон билан баланд кўтаришяпти. Бундан ташқари сув таркибида зарарли лептоспироз моддаси топилган. Ушбу модда сув даражасининг кўтарилиши натижасида келиб чиққанини таъкидлашяпти”.

– Сўнгги йигирма йил ичидаги об-ҳаво буткул ўзгариб кетди, – дейди буғучилик мутахассиси Олаф Матис Эйра, – Скандинавия, Сибир, Аляска, Канада, Швеция ва Гренландиядаги подаларнинг учдан икки қисми бизга номаълум сабаблар билан қирилиб кетяпти. Бу ерларда кор ўрнига кўпроқ ёмғир ёғиши кузатиляпти. Биз буғуларни сақлаб қолиш учун уларни ем билан бокишига баҳоли кудрат ҳаракат қиляпмиз, лекин бу жисмонан ва экологик жиҳатдан нотўғри. Балки бу ўзгаришлар инсониятнинг аёвсиз тоза ер-

лардан чиқиндиларни қайта ишлаш йўлида фойдаланаётганидандир. Саноқли қолган бу жонзотлар ана шу қаҳратон совуқ диёrlарнинг ҳавосига ўрганган ва мослашган.

Мутахассислар Исландия иқлимини кузатар экан қиши фаслида ажойиб кўринишнинг гувоҳи бўлишди. Одатда қаҳратон совуқ бўлиш ўрнига ўтган йили қишида Исландиянинг ҳарорати 10 даражагача исиб кетди. Бунаقا пайт бу ерда кўм-кўк далалар ва ям-яшил ўтлоклар сақланиб туришидек ғайриоддий ҳолатни кузатишган.

Мутахассислар таъкидлашича, ҳозир табиатда чиқиндиларни заарсизлантириш, бартараф этишга хизмат қилувчи микроорганизмларнинг сони ва фоллиги анча сусайган. Бу ҳолат чиқиндиларнинг табиий қайта ишланиши издан чиқишига, йилдан-йилга кўпайиб боришига, охир-оқибатда эса уларнинг тасирида тупроқ ҳамда атмосфера таркибининг ўзгаришига сабаб бўлмоқда. Саноат корхоналаридаги иш жараёнида атроф-муҳитга зарар етказувчи кимёвий моддалар – хлор, олtingу-гурт, азот оксидлари газ ҳолида чиқади ва ёмғир, кор орқали бу моддалар ерга қайтиб тушади. Табиийки, бу моддалар бизнинг истеъмол маҳсулотларимиз таркибидан жой олади. Олимлар бунинг натижасида инсонларда саратор касаллиги келиб чиқиши, иммунитетнинг пасайишини аниқлашган.

Ривожланган мамлакатларда ишлаб чиқаришнинг кескин ўсиши атмосферада зарарли газлар олиб келди. Сайёрамиз табиатини асрарш, атроф-муҳитни муҳофаза қилиш мақсадида 1998 йили 16 март куни Япониянинг Кито шаҳрида қатор етакчи давлатлар вакиллари иштироки-

да қарор қабул қилинган. Беш йилга мўлжалланган лойиҳа бўйича бир қатор мамлакатлар олти хил газ – CO_2 , CH_4 , гидрофторуглеводород, перфторуглеводород, N_2O ва SF_6 турларини ишлаб чиқаришни камайтиради. Жумладан, атмосферага заарли газлар ишлаб чиқаришни Оврупа иттифоқи давлатлари 8, Америка 7, Япония ва Канада 6, Шарқий Оврупа ва Прибалтика 8 фоизга камайтиришга, Россия ва Украина эса ҳозирги ҳолатдан кўпайтирмасликка ҳамда ушбу қарорга 2020 йилгача амал қилишга келишиб олинган.

“Анъом” сурасининг тўқсон тўққизинчи оятида марҳамат қилинади: «**У осмондан сув (ёмғир) туширган зотdir. У билан ҳар нарсани (ердан) ундириб чиқардик. Ундан яшил гиёҳ (полиз экинлари)ни чиқардик. Ундан (бошоқ каби) зич таркибли донларни чиқарамиз. Хурмодан эса, унинг шохидағи (мева) бошлари (ерга) якини (ва яқин бўлмаганлари) бор. Шунингдек, узумзор боғлар, бир-бирига ўхшаган ва ўхшамаган зайдун ва аорларни (чиқардик). Уларнинг мевалагандаги (ғўр) мевасига ва пишганига (ибрат кўзи билан) бокинг!** Шу (билган)-ларингизда, албатта, имонли қавмлар учун аломатлар бордир». Пайғамбаримизнинг (у зотга Алоҳининг саломи бўйича) бир ҳадисларида эса бундай дейилади: “Уйларингизда ахлат-чиқиндиларни қолдирманг, чунки ифлос ва исроф жину шайтонларнинг хуш кўриб ўтирадиган жойлариидир”. Табиатга, атроф-муҳитга нисбатан оқилона, тежамли муносабатда бўлиш ҳар бир инсон учун ҳам фарз ҳам қарзdir.

Азизхон ҲАКИМОВ
тайёрлади.

ҚАЛБИМНИНГ БИР ПАРЧАСИ

“Боламни кўрсам бўладими?” деди она. Мургак жигаргўшасининг юзини кўриши учун қўлига олар экан, олдин бағрига босиб, ҳидлади, сўнг йўргакни очиб юзига қаради ва бирдан нафаси бўгилди. Чакалоқнинг қулоқлари ўйқ эди... Шифокорлар ота-онасига тасалли бериб, бу ҳол боланинг эшиши қобилиятига унчалик таъсир қилмаслигини айтишиди.

Орадан йиллар ўтди. Бола улғайиб, мактабда ўқий бошлиди. Бир куни мактабдан келиб, ўзини онасининг бағрига отиб, йиғлаб юборди. Фарзандини илк бор бундай ахволда кўрган она нима бўлганини тушуниб турса-да, сабабини сўради.

— Катта болалар мени “махлук” деб мазах қилишди...

Ўғли улғайгани сайин унинг одамлар орасига киришиб кетуви ота-онани ташвишга соларди. Онаси: “Болам, одамларга қўшилишинг керак” дер, ammo ич-ичидан ачиниш хисси уни қийнарди. Отаси шифокорларга учрашиди. Агар қулоқ топилса, аъзони кўчириш йўли билан фар-

зандингизга ёрдам беришимиз мумкин, дейишидди улар.

Ота-она қулоқларини бериши мумкин бўлган одамини қидира бошлашди. Орадан икки йилча вакт ўтди. Бир куни ота ўғлига қулоқларини берувчи инсонни топганини, лекин бу сирлигича қолиши хушхабарани айтди. Амалиёт яхши ўтди. Ўғил ҳамма қатори чиройли қиёфага эга бўлди, ўзгариш руҳиятини кўтарди. Ҳам ўқишида, ҳам ижтимоий ҳаётда ютуқларга эришди. Кейинчалик уйланди, обрўли инсон бўлиб етишди. Йиллар эса бир-бирини қувиб ўтаверди. Кунларнинг бирида ўғил отасига: “Неча йилдирки яхшилик қилган кишининг

кимлигини мендан сир сақлаб келяпсиз, ахир, унга мен ҳам кўлимдан келганича яхшилик қилишим керак-ку”, деди. Да-даси вақти келиб айтишини таъкидлади...

Онаси вафот этган кун эди. Волидасининг бош тарафида ўтиришганида, отаси секингина марҳуманинг соchlарини орқага сурди. Онасининг қулоқлари ўйқ эди!..

Она фарзанди учун фидкорлик қилган эди. Фақатгина севги ва марҳамат каби оналик туйғулари билан ардоқлаш мумкин бўлган “қалбининг бир парчаси”га жисмининг бир парчасини ҳам берган эди...

Ирода ТЎЛАГАНОВА
тайёрлади.

МУХТАРАМ ЎРТДОШЛАР!

Ўзбекистон мусулмонлари идорасининг нацирлари – «Хидоят» журнали ва «Ислом нури» газетасига, уларнинг қорақалпоқча иловаларига 2013 йил учун обуна давом этмоқда. Республикализнинг барча алоқа бўлимларида ва жойлардаги масжидларда обуна бўлишингиз мумкин. Обуна учун тўлов пластик карточкалардан терминал орқали ҳам қабул қилинади.

Нашир кўрсаткичлари:

«Хидоят» – 1034, 1051



«Ислом нури» – 195



Қорақалпоқча иловалар – 1035



*Ўзбекистон мусулмонлари идорасининг интернет саҳифаси:
WWW.MUSLIM.UZ*

*Саволлар ва тақлифларни жўнатишни учун электрон манзил:
moslim@mail.ru*